

elhuyar

350 zk. | 2023ko ekaina

6,90 euro

Menopausiaz
CAF - Elhuyar sariak
Bernhard Schölkopf
eta adimen artifiziala



TEKNOPOLIS



Zientzia, teknologia, ikerketa eta berrikuntzari
buruzko telebista-saioa

etb

Larunbata, 13:30



etb

Igandea, 11:55



Ekoizleak:  elhuyar

Babesleak:



Zientzia gizarteratzea helburu

Udaberri honetan argitaratu da Espainiako gizartearen zientziari eta teknologiari buruzko ikuspegiaren 2022ko inkesta. Bi urtez behin argitaratzen du FECYT zientzia eta teknologiaren fundazioak, 2002tik, eta erabilgarria da euskal gizartearen ikuspegia gutxi gorabehera ezagutzeko, joerak antzekoak izango direlakoan erkidego guztietan (datuak ez daude bereizita), baita Iparraldean ere (ez dugu hango daturik).

Erantzunen eboluzioari erreparatuz gero, azken 20 urteotan, haziz joan da zientzia eta teknologiarekiko interesa, eta informatuta egotearen ustea. Informazio-iturri nagusia Internet da 2012tik, eta pixkanaka jaitsi egin da paperezko euskarrien lekua. Zientzialariei buruzko iritzia oso ona izan da beti, baina gero eta gutxiagok uste dute gazteentzat lanbide erakargarria dela, ospea duela eta ondo ordainduta dagoela.

Bestalde, denborarekin, gora egin du zientzia eta teknologiaren onurak arriskuak baino handiagoak direla uste dutenen ehunekoak. Era berean, ugaritu egin dira uste dutenak ezagutza zientifikoa dela arauen eta legeen oinarririk onena; baita herritarrek zientzia eta teknologiari buruzko erabaketan parte-hartze zuzena izan behar dutela iritzi diotenak ere, haiei zuzenean eragiten dietenean.

Hori horrela izanda, agerikoa da kultura zientifikoa funtsezkoa dela gizarte burujabea, arduratsua eta demokratikoa izateko. Eta, hain zuzen, horretan laguntzea da *Elhuyar* aldizkariaren xedea.

Asmo horrekin sortu ziren, beste egitasmo batzuen artean, CAF-Elhuyar sariak ere. Zenbaki honetan argitaratu ditugu dibulgazio-artikuluen eta norberaren tesian oinarritutako lanen kategorietako lan sarituak. Gaiek ez dute zerikusirik elkarren artean, baina bien egileak dira gazteak, eta biek lortzen dute ezagutzarekiko grina kutsatzea eta ezagutza zientifikoa zabaltzea. Bejondeiela! ●

42

Menopausiaz, osotasunean



Menopausiari buruzko estigmak, ezjakintasunak edo desinformazioak eragiten duten kalteei aurre egiteko eta menopausia normalizatzeko aritu dira eta ari dira lanean Inma Vila Mendiburu ginekologoa eta Juncal Alzugaray Zurimendi fisioterapeuta.



Presak eraisten

50

Ibaia jarroa da, garraioa da, mugimendua da, bizia da. Errotak eta burdinolak egiten hasi zenetik, gizakia oztopoak jarri eta jarri aritu zaio ibaien jarioari, eta biziari. Oztopo horiek eraisteko garaia da.

34

ELKARRIZKETA

Bernhard Schölkopf adimen artifizialaz



Bernhard Schölkopf ezaguna da adimen artifizialaren ikerketaren munduan. Besteak beste, Sistema Adimendunen Max Planck Institutuko zuzendarietako bat da. Ikerketaz ez ezik, beste gai batzuetaz ere aritu da: exoplanetak, irisgarritasuna, jasangarritasuna, ikerketa militarra, filosofia...

- 04** IKUSMIRAN
Balearen begia
- 14** ALBISTEAK
- 24** IRAULTZA TXIKIEN LEKUKOAK
*Jacinto Iturbe
Barrenetxea*
- 26** ERREPORTAJEA
*Rosalind Franklinen
ekarpena, ukaezina*
- 28** ANALISIAK
*AHTa eta auto
elektrikoa, noizko eta
zenbateraino?*
- 34** ELKARRIZKETA
Bernhard Schölkopf
- 40** ERREPORTAJEA
*Pentsamendua eta
gorputza integratzen
dituen sarea*
- 42** ERREPORTAJEA
*Menopausiaz,
osotasunean*
- 50** ERREPORTAJEA
*Ibaietako oztopoak
eraisten*

- 58** MUNDU DIGITALA
*Adimen artifizial
sortzailearen booma*
- 68** ISTORIOAK
*Rachel Carson:
krisi ekologikoaren
lehen notak*
- 72** EKINEAN
Borja Doncel García
- 74** ERREPORTAJEA
*Hegazkin
aerodinamikoagoak,
seguruagoak eta
jasangarriagoak helburu*
- 76** 2023ko CAF-ELHUYAR SARIAK
- 78** DIBULGAZIO-ARTIKULU
OROKORRAREN SARIA
*Garena egiten gaituena,
egiten duguna idazteko*
- 82** EGILEAREN DOKTORE-TESIAN
OINARRITUTAKO DIBULGAZIO-
ARTIKULUAREN SARIA
*Elektroiekin dantzan
nanoeskala argitzeko*




Eduki gehiago, webgunean
aldizkaria.elhuyar.eus


Balearen begia

Helena denboraleak ekarri zuen lehenengoa. 2019ko otsailaren hasieran, Atxabiribil hondartzan, Sopelan, 18 metro eta 30 tonako zere bat agertu zen, hiltorian. Jakin orduko bertaratu zen beste Elena bat. Balea haren begia nahi zuen.

[Elena Vecino Cordero](#) EHUKo [GOBE Oftalmo-Biologia Esperimentaleko Ikerketa Taldearen](#) zuzendaria da. Urteak daramatzate gizakien eta beste animalia askoren begiak ikertzen, baina lehenengo aldia zen balea baten begia laborategira eramateko aukera zutena. Aukera aparta, gainera, balea hil berria baitzen, eta laborategia oso gertu baitzegoen. Begi bakarra gelditzen zitzaion arren, oso egoera onean zegoen; erretinako neuronak bizirik zeuden artean. Laborategian dena prest zuten txerriaren begiko neuronak hazteko, eta balearena sartu zuten. Eta lortu zuten balearen neuronak haztea.

Neurona horiek gizakienak baino bi aldiz handiagoak direla ikusi zuten, baina nahiko gutxi dituztela, eta, beraz, ez dutela xehetasun handiz ikusiko. Eta ikusten dutena zuri-beltzean ikusiko





Balearen erretina


Balearen erretina oso baskularizatua dago, neuronek oxigeno asko behar baitute. Baleen odol-hodiak oso handiak dira. Handienek milimetro-erdiko diametroa dute. ARG.: © Elena Vecino.


dute, erretinan ez baitute konorik. Aldiz, ongi bereizten dute noiz den gaua eta noiz eguna, ongi garatuak baitituzte zelula melanopsinikoak, erritmo zirkadianoaz arduratzen direnak.

Baleen neuronen axoiak oso luzeak dira, 3 metrokoak izatera irits litezke (gizakienak 10 cm-koak dira, gehienez); eta axoi horiek hainbeste luzatzea nola lortzen duten jakin nahi izan zuten. Müllerren zeluletan topatu zuten erantzuna. Erretinako neuronak zaintzeaz eta elikatzeaz arduratzen dira zelula horiek. Eta laborategian saguen neuronak baleen Müllerren zelulekin batera jarri zituztenean, ikusi zuten normalean baino 100 aldiz gehiago hazten zirela neuronen axoiak.

2020ko urtarrilean, beste denborale batek, Filomenak, ekarri zuen bigarren aukera: beste zere bat, Asturiasen, Serantes hondartzan. Kasu hartan ere egoera onean zegoen begi bat lortu zuten. Lehenengo begiarekin aurkitutako guztia berrestez gain, Müllerren zelulak hilezkortu zituzten, ikertzen jarraitu ahal izateko.


Ikerketarako ateratako argazkiak zein ederrak ziren ohartuta, erakusketa bat egitea erabaki zuten.





Gongoil-neurona erraldoia

Gongoil-neuronek (horiz eta berdez) bidaltzen dute begiak jasotako informazio bisuala garunera. Baleenak gizakienak baino bi bider handiagoak dira; 75-100 mikrometroko diametroa dute. ARG.: © Elena Vecino.



Kornea-esklara trantsizioa

Kornearen (begiaren zati gardena) eta eskleraren (begiaren zati zuria) artean epitelio bat dago (marroiz). Epitelioaren oinarria Bowmanen mintza da (urdinez). Balearena oso lodia da. Kornearen funtsezko egitura kolagenoa da (berdez). ARG.: © Elena Vecino.

Eta, begietan espezialistak izanik, garrantzi handia eman diote erakusketa ikusmen-arazoak dituztenentzat egokitzeari. Argazkiak mateak dira, islek xehetasunak behar bezala ikustea galaraz ez dezaten, eta asko hurbiltzeko eta xehetasun horiek ondo ikusteko moduan kokatzen dituzte. Irudiak erliebean ere inprimatu dituzte, ukitu ahal izateko, eta azalpen-taulak braillez idatzi dituzte. Irudi bakoitza azaltzen duen audiodigida bat ere badago. Eta aretoan barrena ibiltzeko zinta pododaktil bat ere bai.


lkerketa gizarteratzeko ahalegin handia ari da egiten Vecino. Haurrei zuzendutako hiru animazio-bideo ere sortu dituzte, eta [sarean jarri dituzte ikusgai](#).


Orri hauetan, erakusketako irudi batzuk ikus ditzakezue. Eta erakusketa bera ikusteko ere baduzue aukera: ekainaren 11tik irailaren erdialdera arte, Itsasmuseumen, Bilbon.

Gorputz leizetsuko arteria

Begiaren behealdean, nerbio optikoaren inguruan, ehun bat dago, belaki baten antzekoa: gorputz leizetsua. Kolagenoz eta zuntz elastikoz (berdez) inguratutako arteria-sare batek osatzen du.


Balea itsaso sakonean dabilenean edo lo dagoenean, gorputz leizetsua hustu, eta begiak atzera egiten du, hura babesten duen hezuraren barrualderantz. Baleak ikusi behar duenean, berriz, odolez betetzen dira arteriak, eta kanporantz bultzatzen dituzte begiak. ARG.: © Elena Vecino.





Koagulua

Gorritz, globulu gorriak; urdinez, fibrina eta koagulazioaren beste proteina batzuk. Vecinoren taldeak ikusi du, lehenengoz, halako koagulazio-mota bat, hain simetrikoa, balearen iriseko hodietan. ARG.: © Elena Vecino.




Gorputz ziliarra: humore urtsuaren jatorria


Begiaren barruan, gorputz ziliarra izeneko epitelioa dago; pigmentatu gabeko eta pigmentatutako zelulez (puntu beltzak) osatua. Gorputz ziliarreko zelulek humore urtsua jariatzen dute, eta likido horrek begiaren barneko zelulak elikatzen ditu. Behar baino likido gehiago jariatzen denean edo behar bezala drainatzen ez denean, begi barneko presioa handitu egiten da, eta horrek glaukoma eragin dezake. Horixe da, hain zuzen ere, Vecinoren taldearen ikergai nagusietako bat. ARG.: © Elena Vecino.

Schlemm-en kanala

Humore urtsua Schlemm-en kanaletik ateratzen da kanpora. Buxatzen bada, presioa handitzen da begiaren barruan, eta, ondorioz, glaukoma sortzen da.


Baleetan, Schlemm-en kanalak milimetro-erdiko diametroa du. ARG.: © Elena Vecino.





Zulo beltz bat eta igortzen duen zorrotada jaso dituzte irudi berean

Lehen aldiz, irudi berean jaso dituzte zulo beltz bat eta handik ateratzen den materia-zorrotada handi bat. Zehazki, M87 galaxiaren zulo beltza da, 2019an albiste bihurtu zena irudi batean ikusi ahal izan zen lehen zulo beltza izateagatik. Orain, zulo beltzaren grabitazio-indarretik ihes egiten duen zorrotada bat ere jaso dute irudi berean.



Zulo beltzaren itzala eta zorrotada erakusten dituen irudia.
ARG.: R.-S. Lu (SHAO), E. Ros (MPIfR), S. Dagnello (NRAO/AUI/NSF).

Irudia lortzeko, mundu osoan sakabanatuta dauden teleskopioen sare bat erabili dute: Global Millimetre VLBI Array (GMVA), Atacama Large Millimeter/submillimeter Array (ALMA) eta Groenlandiako teleskopioa (GLT). Horrela, aurreko irudian nabaritzen ez ziren uhin-luzerak jaso dituzte, eta horrek aukera eman die hobeto ulertzeko nolakoak diren zulo beltzak eta haietan gertatzen diren fenomenoak.

Adibidez, GMVAk orain hautemandako eraztunaren neurria aurrekoan jasotakoa baino % 50 handiagoa da, gutxi gorabehera. Astrofisikariaren arabera, horrek adierazten du material gehiago ari dela erortzen zulo beltzera, orduan baino. ●

Irakurketaren, garunaren eta geneen arteko erlazioa aztertu dute

Irakurketak garunaren egitura aldaketarik eragiten ote duen eta osagai genetikoek horretan zerikusirik ba ote duten aztertu dute kognizioa, garuna eta hizkuntza aztertzeko BCBL zentroan. *Nature Human Behaviour* aldizkarian argitaratu dituzte emaitzak, eta, haien arabera, garunean aztertu dituzten 150 neurketetatik, irakurketa bederatzirekin erlazioatuta dago. Haien artean, irakurketa-sareko funtsezko eremuak daude. Are gehiago, frogatu dute osagai genetikoak eragina duela bi neurketa jakinetan: ezkerreko hemisferioaren azalera eta goiko zirkunboluzio tenporalarenean.



Irakurketak garunean zer aldaketa eragiten dituen argitu dute. ARG.: Jabego publikoa.

Ikerketa egiteko, 9-10 urteko nerabeen garunaren garapenaren datu-bilduma erabili dute (*Adolescent Brain Cognitive Development dataset*), eta, geneen, garunaren eta irakurketaren artean erlazio konplexua dagoela berrestez gain, ondorioztatu dute trebezia poligeniko partzialki heredagarria dela eta sare banatu baten mende dagoela. ●

Doñana arrisku larrian dagoela ohartarazi dute zientzialariek



Laguna del Moral urmaelaren bilakera. Gaur egun, eremu lehorretako landarediak hartu du lehen urez beteta zegoen gunea.
ARG.: EBD-CSIC.

Doñanako Estazio Biologikoak argitaratu duen azken ikerketaren arabera, Doñanako urmael-sistemaren % 59,2 galdu da 1985-2018 urteen artean. Neurri batean, euri-gabeziaren eta tenperaturaren igoeraren ondorioz desagertu dira urmaelak, baina frogatu dute giza jarduerak ere eragin zuzena izan duela: landaketak, eraikuntza, golf-zelaia, ur-erauzketak...

Datuek ez dute zalantzarako tarterik uzten: Doñana egoera kritikoan dago. Horren adierazgarri, udan lehortzen ez ziren hiru urmael handi bakarrak jada ez dira iraunkorrak; adibidez, El Sopotón eta La Dulce orain sarri lehortzen dira. Handiena ere, Santa Olalla, egoera kritikoan dago 2012tik.

Urmaelen bilakaerari jarraipena egiteko, Landsat sateliteak hartutako 442 irudi aztertu dituzte,

eta animalietan eta landareetan bilakaera horrek dituen ondorioak ere ikertu dituzte. Esate baterako, ikusi dute anfibioen dibertsitatea ia erdira jaitsi dela 2003tik 2021era: kilometro karratuko 4,3 espeziekoa izatetik, 2,5ekoa izatera igaro da. Bestalde, Iberiar penintsulako bi galapago-espezie autoktonoak (biak ere Europako espezie mehatxatuen zerrenda gorrian daude) egoera kezagarrian daude, baita sorgin-orratzak eta txitxi-burruntziak ere. Arrainak eta aingirak ere hiltzen ari dira. Eta landare akuatiko batzuk ere desagertzeko arriskuan daude.

Bestelako habitatei ere nabaritzen zaie ur falta. Babestutako eremuaren barruan, ehunka urte dituzten artelatzen % 8,3 hil dira 2010etik, eta % 10 oso gaizki daude. ●

240 ugaztunen genomak alderatu dituzte

Nazioarteko zientzialari-talde batek 240 ugaztun-espeziaren genomak dibertsitatea aztertu du: milioika urtean zehar zein zati aldatu diren eta zein kontserbatu diren. Funtsezko informazioa da ugaztunen eboluzioa eta haien arteko desberdintasunak ulertzeko; baita gizakion gaixotasun batzuen gakoak ezagutzeko ere. Hamaika artikulua argitaratu dituzte, orain arteko emaitzekin, *Science* aldizkariaren zenbaki berezi batean. Baina, ikertzaileen esanean, datu horiekin egin daitekeenaren zati bat baino ez da hori.

Zoonomia Proiektuan 240 ugaztunen (ugaztun-familien % 80) genomak sekuentziatu eta alderatu dituzte. Alderaketa horren bidez, identifikatu dituzte ugaztunetan funtzio garrantzitsuak dituzten eskualdeak, espezieen ezaugarri bereizgarriak eragin dituzten mutazio genetikoak eta gaixotasunak sor ditzaketen aldaketak.

Arreta berezia jarri dute espezieen artean, eboluzioan zehar, aldatu gabe iraun duten zatietan; zati horiek biologikoki garrantzitsuak izango direlakoan. Zati horiek, proteinak kodetu ez arren, proteinak

non, noiz eta nola sortu behar diren kodetzen dute, askotan; eta zati horietako mutazioek eragin ditzakete gaixotasunak edo espezieen ezaugarri bereizgarriak.

Bada, horixe berretsi dute ikerketa honetan, eta ikusi dute gizakietan genomaren % 10, gutxienez, funtzionala dela; proteinak kodetzen dituen zatia (% 1) baino 10 aldiz handiagoa. Eta hainbat gaixotasunetan gako izan litezkeen aldaera genetiko batzuk identifikatu dituzte. Esaterako, garuneko minbizia duten gaixoetan identifikatu dituzte mutazio batzuk eboluzioan aldatu gabe iraun duten zati horietako batzuetan; eta uste dute eragina izan dezaketela tumoreen hazkuntzan eta tratamenduekiko erantzunean.

Bestalde, ugaztunen ezaugarri berezi batzuen erantzule izan litezkeen aldaketa batzuk ere identifikatu dituzte, hala nola garunaren tamaina apartekoa, usaimen oso garatua eta hibernatzeko gaitasuna. Eta ondorioztatu dute dinosauroak desagertu baino lehenago hasi zela ugaztunen dibergentzia. ●



Desagertzeko zorian dauden
52 espezie aztertu dituzte
Zoonomian; Amazonas ibaiko
izurdea da horietako bat.
ARG.: Marcos Amend.

Kalamuan THCa eta kanabidiola neurtzeko teknika merke eta azkar bat

Kalamuan THCa eta kanabidiola neurtzeko infragorri hurbileko espektroskopia teknika merkea eta azkarra dela erakutsi dute Nafarroako Unibertsitate Publikoko ikertzaileek.



ARG.: Herbal Hemp/Pixabay.

Kompolti kalamu-landareekin egin dute lan ikertzaileek. Kalamu industrialaren barietate bat da, eta psikotropikoen kantitate txikia du (hala nola THCa), handia, aldiz, psikotropikoa ez den beste osagai batena, kanabidiolarena (CBD). Nahiz eta barietate hori baimenduta egon, egiaztatu behar da uztak THC-maila baxuak dituela. Kromatografia likidoa erabiltzen da horretarako. Arazoa da egunak behar direla emaitzak eskuratzeko eta prozedura garestia dela.

Bada, ikertzaileek frogatu dute infragorri hurbileko espektroskopia azkarragoa, merkeagoa eta jasangarriagoa dela kromatografia likidoa baino. Izan ere, emaitzak unean bertan eta merke lor daitezke, ez du errektibo kimikorik behar eta ez du hondakinik sortzen. Ikertzaileek azaldu dutenez, hala ere, oraingoz ezin du kromatografia likidoa ordezkatu, baina aukera emango luke zer emaitza lortuko diren aurrez jakiteko, baita soroan ere, uztza bildu aurretik. ●

Kostako ornogabeak Ozeano Bareko plastiko-uhartean

Ozeano Bareko mendebaldeko kostako itsas ornogabeek komunitate bat sortu dute Ipar Pazifikoko ekialdeko zurrumbilo subtropikaleko hondakin plastikoetan. Hondakin-multzo hori Ozeano Bareko plastiko-uhartearen izenez ere ezagutzen da, eta itsas zabalean dago. Ikertzaileek, baina, frogatu dute kostako itsas ornogabeen bizileku bihurtu dela, eta ugaltze ere egiten direla leku hartan. Komunitate neopelagikoa deitu diote.

Ikertzaileek egiteko, 105 hondakin plastiko flotatzaile jaso zituzten. Guztira, 484 organismo ornogabe identifikatu zituzten laginetan, eta haietatik % 80 kostaldeko habitatatetan egon ohi diren espezieak ziren. Kostaldeko espezieen kopurua, hala nola artropodoak eta moluskuak, normalean itsaso irekian bizi diren espezie pelagikoen baino hiru aldiz handiagoa izan zen.



Kostako ornogabeak itsas zabaleko plastiko-hondakinetan bizitzeko gai direla frogatu dute. ARG.: Limbah/Flickr/CC BY-SA 2.0.

Ikertzaileen esanean, jatorrizko espezieak gai dira hainbat urtean milaka kilometro egiteko hondakin plastikoetan, eta bizirik irauteko eta ugaltzeko. Hortik ondorioztatzen dute, gainera, orain arte itsaso zabalean ez bizi izanaren arrazoiak ez zela ekologikoa ez fisiologikoa, baizik eta ez zutela substraturik. ●

Hibernatzen ari diren hartzak eta mugitu ezin diren pertsonak tronboetatik zerk babesten dituen aurkitu dute

Epe luzeko mugiezintasuna duten pertsonak eta hibernatzen ari diren hartzak odolbilduak osatzeko gako den proteina baten maila txikiagoak dituzte, eta horrek babesten ditu tronboak edo enboliak izatetik. Horixe erakusten du *Science* aldizkarian argitaratu duten ikerketa batek.

Denbora luzez geldirik egotean tronboak eta enboliak izateko arriskua handitu egiten den arren, mugiezintasun kronikoa duten pertsonak ez dute pertsona osasuntsuek baino tronbosi gehiago izaten. Eta hartzek ere, hilabeteetan hibernatzen egon arren, ez dute horrelako arazorik izaten. Ikertzaileek ikusi dute bi kasuetan HPS47 proteina gutxiago dutela odolean.


Saguekin egindako probetan baieztatu dute HSP47 proteinarik ez duten saguetan askoz odolbildu gutxiago sortzen direla. Eta ikusi dute gauza bera gertatu zaiela beste esperimentu baterako, borronteaz, denbora luzez ohean egon ziren 12 pertsona osasuntsurekin. Kasu horretan, 27 egun geldirik egon ondoren, HSP47 proteinaren maila jaitxi egin zitzairen. ●



ARG.: Pixamio/Pixabay.

Inoiz behatutako galaxia nano urrunena hauteman dute

James Webb Space (JWST) teleskopioaren be-reizmen handia eta grabitazio-lente ahaltsu bat erabiliz, ikertzaile-talde batek ondorioztatu du hasierako unibertsoan sortu ziren galaxiak oso txikiak zirela. Haien esanean, horrek adierazten du bilakaera-prozesu hierarkiko bat gertatu zela, zeinean galaxia nanoetatik abiatuta galaxia handiak sortu baitziren; Esne Bidea, adibidez.



Koloretako irudiko 3 zirkuluak lehen planoan dauden galaxia-multzo distiratsuek handitutako galaxia urrunaren hiru irudiak dira. ARG.: ESA/Webb, NASA & CSA, P. Kelly.

Horrez gain, urruneko unibertsoan zenbait galaxiaren espektroak aztertuz, taldeak baieztatu du inoiz aurkitu den galaxia nano urrunena hauteman duela. Azaldu duenez, galaxia txiki eta argitasun oso txikiko hori eratu zen lehenetariko bat izan zen, Big Banga gertatu eta 500 milioi urte soilik igaro ondoren, unibertsoaren bolumena gaur baino milaka aldiz txikiagoa zenean. Aurkikuntza hori kasualitatez egin dutela adierazi du Tom Broadhurst ikerketa-taldeko kide, EHUKo Ikerbasque irakasle eta DIPCKo kide elkartuak. ●

**Martxoaren 8tik
aurrera**

**berria
fm**

PODCASTA

Ziklo berria

**Kazetaritza
feminista**
erraietan
eta uhinetan

UXUE **Rey**

ANE

Eslaba

**Hamabostean behin, asteazkenez,
[Berria.eus/podcast](https://berria.eus/podcast) webgunean eta plataformetan entzungai.**

Klimaren eta biodibertsitatearen krisia bereizezinak dira eta bie batera egin behar zaie aurre

Klima-aldaketak eta planeta osoko biodibertsitatearen galerak okerrera egiten jarraitzen dute, eta bi krisiak elkarren artean loturarik ez duten bi hondamendi desberdin balira bezala aztertzen dira askotan. Akatsa da hori, nazioarteko ikertzaile-talde batek *Science* aldizkarian argitaratutako artikulu batean azaldu duenez. Ikuspegi hori aldatzeko eskatu dute artikulu horretan, biak guztiz lotuta daudelako eta bie batera aurre egin behar zaielako. Eta erakundeen arteko lankidetzak eskatu dute, krisi bikoitz horren atzean dauden egungo sistema ekonomiko eta politikoak lehenbailehen eraldatzeko.

planetako lurrazalaren % 75 eta itsasoko uren % 66 inguru aldarazi dute, ugaztunen biomasaren % 80 eta landare-biomasaren % 50 inguru galdu da, eta giza historiako beste edozein garaitan baino espezie gehiago daude galtzeko arriskuan". Eta Pascualek gaineratu duenez, "beroketa globalak eta habitat naturalen suntsipenak, biodibertsitatea ez ezik, organismoek, lurzoruek eta sedimentuek karbonoa biltegiratzeko duten gaitasuna ere murrizten dute, eta krisi klimatikoa larriagotu".

"Ingurumen-krisi bikoitz honek begi-bistako eragina du dagoeneko gizartean, maila askotan, eta mundu




ARG.: Anita/Pixabay.

Lan horretan bi krisien arteko loturak argitu dituzte, baita bi hondamendiei aurre egiteko eta dagoeneko gizartean dituzten inpaktu izugarriak arintzeko soluzioak proposatu ere: adibidez, isurpenak murriztea, ekosistemak babestea eta lurzorua erabilerara modu adimentsuan kudeatzea.

Basque Centre for Climate Change (BC3) zentroko Unai Pascual ikertzailea da artikulua egileetako bat. Hark azaldu duenez, "giza jarduerak gure

osoan zaurgarriak diren giza taldeen ekitatea eta egokitzeko gaitasuna okertu dute bereziki", dio Pascualek. "Klima-aldaketa aurrak babesa eta biodibertsitatearen kontserbazioa batera jorratu behar dira, eta historikoki planeta hozten eta egungo biodibertsitate globala hein handi batean babesten lagundu duten tokiko komunitateei eta herri indigenei abantaila sozialak eskainiko dizkieten esku-hartze politikoak behar dira". ●

AEBko bi zientzia-akademia nagusi emakumeak lehenesten ari dira



ARG.: Artxibokoa.

Azken 20 urteetan, emakumezkoek lehentasuna izan dute AEBko Zientzia Akademian (NAS) eta Arteen eta Zientzien Akademian sartzeko, argitalpen- eta aipamen-historial bertsuko gizonezkoekin alderatuta. Ondorio horretara iritsi da nazioarteko ikerketa-talde bat, kideak hautatzean izan den genero-arrakalaren 60 urteko bilakaera aztertuta, hiru arlotan: psikologia, ekonomia eta matematika.

EHUko kide Nagore Iriberrri Etxebeste izan da ikertzaileetako bat, eta, ikerketaren arabera, duela 60 urte emakumezkoek probabilitate txikiagoa zuten akademiko gisa hautatuak izateko, antzeko argitalpen- eta aipamen-historiak zituzten gizonezkoen aldean. 90eko hamarkadan, bi akademietako hautaketa-prozesua gutxi-asko neutroa zen, generoaren ikuspegitik. Eta azken hogeitau urteetan, emakumezkoen aldeko lehentasun positiboa hautematen da hiru arloetan.

Nolanahi ere, Iriberrrik adierazi du akademia horietako emakumeen ordezkaritza oraindik ez dela "inondik inora % 50era iristen matematikan eta ekonomian", psikologian ez bezala. ●

Animalia basatien populazioak berreskuratzea, onuragarria klima-larrialdiari aurre egiteko

Animalia-espezie gako batzuen populazioak berreskuratuta eta babestuta, asko hobetu daiteke karbonoaren harrapaketa eta metaketa naturala, eta horrek asko lagunduko luke klima-larrialdiari aurre egiten. Ondorio hori atera dute *Nature Climate Change* aldizkarian argitaratu berri duten ikerketa batean.

Izan ere, animalia basatiek zuzenean eragiten dute beren ekosistemako karbonoaren zikloan. Hala, lan honetan ikertzaileek bederatzi animalia edo animalia-talderen eragina kalkulatu dute: itsas arrainak, baleak, marrazoak, otsoak, ñuak, itsas igarabak, idi musketadunak, elefante afrikarrak eta bisonte amerikarrak. Eta ikusi dute ezen, animalia horien populazioak babestuta eta berreskuratuta, urtean 6,4 mila milioi tona CO₂ gehiago harrapatzea lor litekeela.

Azpimarratu dute aukeratu dituzten adibideez gain beste hautagai apropos mordo bat daudela. Gainera, animalia horiengan giza jarduerak eragin handia dutenez, ikusten dute badela erraz berreskuratzeako aukera kondizio egokiak jarritz gero. Horrela, lortuko litzateke karbonoaren zikloan eragitea eta askoz karbono gehiago harrapatzea. ●



ARG.: Christel Sagniez/Pixabay.

Landare estresatuek soinu- adierazten dute beren egoera

lkerketa batean frogatu dute tomate- eta tabako-landare estresatuek igortzen duten soinua aire bidez hedatzen dela eta metro batera ere detekta daitekeela. Pertsonak ez dira gai soinu horiek entzuteko, baina, ikertzaileen esanean, oso litekeena da beste ugaztun batzuek eta intsektuek entzutea, eta, seguru asko, baita beste landare batzuek ere.

Esperimentuan, landare osasuntsuak eta estresatuak grabatu zituzten. Bi estres-mota eragin zizkieten: batzuk ez zituzten ureztatu, eta beste batzuei zurtainak moztu zizkieten. Gero, grabaketak alderatu zituzten ikasketa automatikoko algoritmo baten bidez. Horrela ikusi zuten landare osasuntsuak oso isilak direla. Aldiz, ur-gabezia zutenak klik batzuk igortzen hasi ziren, eta 5. egunean iritsi ziren seinale akustikoen maximora. Handik aurrera, pixkanaka, gero eta isilago egon ziren, guztiz lehortzean isilik geratu arte.



Tabako-landaketa bat.
ARG.: Bishnu Sarangi/Pixabay.

Algoritmoa gai da landare lehorrek igorritako soinua eta zurtainak moztutakoena bereizteko, baita landarea tomatea ala tabakoa den jakiteko ere. Oraindik ez dakite zehatz nola sortzen dituzten soinuak. Uste dute litekeena dela landareen hodi-sisteman sortzen diren burbuilen bidez sortzea. ●

Malariaren txertoak nabarmen gutxitu ditu haurren ospitaleratzeak eta heriotzak



Malariaren kontrako txertaketa emaitza onak ematen ari da.
ARG.: Pete Lewis/Department for International Development.

Osasunaren Mundu Erakundeak iragarri duenez, malariaren kontrako STS,S txertoarekin egindako fase pilotua emaitza itxaropentsuak izaten ari da. 2019an hasi zen fase hori, eta dagoeneko 1,2 milioi haur baino gehiago daude immunizatuta Kenyan, Malawin eta Ghanan. Eta frogatu dute nabarmen gutxitu direla infekzio larriak eta heriotzak malariak gogorren jotzen zuen eremuetan.

Adibidez, kalkulatu dute Homa badian (Kenyan, Victoria aintziraren ertzean) malariaren prebalentzia % 19-27 jaitsi dela haurretan. Emaitza horiek ikusita, txertaketa beste eremu batzuetara zabaltzea erabaki dute, eta dei egin diete gurasoei haurrak immunizatzeko behar dituzten lau dosiak hartzera eraman ditzaten. ●



[Albiste gehiago,
webgunean](#)

UDAKO TOPAKE TAK

Uztailak 3, 4 eta 5, Donostian



hh
hik hasi


Universidad
del País Vasco Euskal Herriko
Unibertsitatea

Informazioa eta izen-ematea: www.hikhasi.eus

Jacinto Iturbe Barrenetxea

Kimikaria



ARG.: Iñigo Ibañez/Elhuyar

“Guztiaren teoriaren sorreraren lekukoa izatea gustatuko litzaidake”

Ana Galarraga Aiestaran · Elhuyar Zientzia

Jacinto Iturbe Barrenetxeak (Bilbo, 1951) jaso du 2023ko CAF-Elhuyar Merezimendu Saria, zientziaren dibulgazioan eta euskararen normalizazioan egindako lanarengatik. Izan ere, Bilboko Unibertsitatean (gero Euskal Herriko Unibertsitatea bilakatuko zena) Kimika ikasi zuen, eta 1974. urtean euskaraz idatzitako lehen tesina aurkeztu zuen. Kimikako euskarazko testuliburuak sortu zituen, eta aitzindarietako bat izan zen kimikako testuliburuak idazten eta ikasgaiak euskaraz ematen. Euskaltzaindiak euskaltzain urgazle izendatu zuen 2006an. Euskal Herriko Unibertsitateko Zientzia eta Teknologia Fakultatean irakasle izan da zenbait urtez, baina gaur egun erretiroa hartuta dago. Pozik eta eskertuta jaso du saria, eta gogo onez erantzun die galderei.

Zerk harritu, asaldatu edo txunditu zaitu gehien, lanean hasi zinenetik?

1979an hasita, bi urteko egonaldia egin nuen Ameriketako Estatu Batuetan.

Kimika-ikasketak bukatuta, ia bost urte neramatzan EHUko Zientzia Fakultatean lanean, eta, arrazoi ugari direla eta, urte haietan —1970eko hamarkada— ikerketak ez zeukan unibertsitate batean eduki beharko zukeen lekua. Horregatik, aukera izan nuenean, puntako ikerketa-zentro batera joateko aukera etorri zitzaidanean, hara joan nintzen, AEBko Oak Ridge laborategira.

Mundu berria zen, alde guztietatik: lana antolatzeko modua, bitarteko teknikoak eta humanoak, ideiak garatzeko eztabaidak... dena zen desberdina. Aurretik liburuetan edo aldizkarietan baino ikusten ez nituen teknikak han zeuden, errealak ziren, eta nire zain zeuden. Saiatu nintzen ahalik eta gehiena ikasten eta neureganatzen.

Atera nuen ondorioa zera izan zen: Euskal Herrian zientziaren eta teknologiaren arloetan ikerketa egin nahi bada, beharrezkoa da puntako ikerketa egiten den tokietara joatea eta nola egiten den ikastea —xurgatzea—. Zorionez, denborarekin, ikusi da nola gero eta jende gehiago joaten den erbesteko zentroetara, nola sendotu diren beste ikastegi eta ikertegi batzuekiko harremanak, nola ugaritu diren kolaborazioak... Azken urteotan, Euskal Herrian, ikerketa-zentroak sortu dira, unibertsitate publikoak ikerketa-gune bilakatu dira, eta ikusten da nola etortzen diren beste zentro batzuetatik ikustera eta ikastera ikerketa hemen nola egiten den.

Zer iraultzaren edo aurkikuntzaren lekuko izan nahiko zenuke?


Bada, zientziaren egoera ikusita, nahiko nuke mekanika kuantikoa eta erlatibitatea bateratuko lituzkeen Guztiaren teoriaren sorreraren leku-koa izatea. Zeren eta funtsezkoak izan baitira bai bata eta bai besteak eman dituzten naturaren ezagumenduak eta teknologiaren aurreramen-durako oinarriak, gaur eguneko egoera zientifikoa gauzatzeko. Eta Guztiaren teoriarekin ezagutza zabalagoa eta sakonagoa izango da, duda barik.

Teoria hori etorri datorren artean, konformatu egin beharko dut gaur egunean ikusten ditudanekin: azeleragailuak eta partikula berriak, genetika eta CRISPR-cas9 edizioa, propietate desiratuak dituzten substantzien sintesia, adimen artifizialaren edo ordenagailu kuantikoen ahalmen aurrean-gaitzak, etorkizun diren korapilatze kuantikoaren aplikazioak... ●

Rosalind Frankliren ekarpena, **ukaezina**

Ana Galarraga Aiestaran • Elhuyar Zientzia

Rosalind Franklin zientzia-arloko bazterkeriaren adibide ezagunenetakoa bat da. Izan ere, jakina da Franklinek egindako lana (bereziki, 51 argazkiaren izenez eza-gutzen den irudi ikonikoa) baliatu zutela James Watsonek eta Francis Crickek DNAREN egitura asmatzeko. Alabaina, hasiera batean, bi ikertzaileek ez zioten halakorik aitortu Franklini, eta aipamen bat baino ez zioten egin, justu duela 70 urte DNAREN egitura argituz [Nature aldizkarian, argitaratu zuten artikulua](#) [aren amaieran](#).



Rosalind Franklin mikroskopioarekin lanean, 1955ean.
ARG.: MRC Laboratory of Molecular Biology/CC 4.0.

Gerora, Frankliren ikerketa nabarmendu bada ere, zalantzan jarri da zenbateraino jabetzen zen irudi haren esanahiaz. Hain zuzen, gehien zabaldu den ikuspegia James Watsonek idatzi zuen liburu batean oinarritzen da. *The Double Helix: A Personal Account of the Discovery of the Structure of DNA* du izenburua ("Helize bikoitza: DNAREN egituraren aurkikuntzari buruzko azalpen pertsonal bat"), eta, haren arabera, Franklinek DNAREN egitura erakusten zuen irudia lortu zuen, baina ez zen ohartu zer esan nahi zuen. Aldiz, ikusi orduko jabetu zen Watson helize bikoitzaren egitura adierazten zuela.

Liburua Frankliren heriotzaren ondotik argitaratu zen, eta oso eztabaidatua izan da. Zientzialari batek baino gehiagok gezurtatu ditu Watsonek idatzitako zenbait adierazpen, eta Watsonek berak ere aitortu zuen gero urteak behar izan zituela Frankliren eskuzabaltasuna onartzeko. Beste lekukotza batzuek ere erakusten dute afera korapilotsua izan zela. Oso ezaguna da, esaterako, Franklinek eta Wilkinsek harreman benetan txarra zutela elkarren artean.

Orain, garai hartako dokumentu batzuek agerian jarri dute Watsonek eta Crickek bezainbeste

ulertzen zuela DNAREN egitura Franklinek. Matthew Cobbek eta Nathaniel Comfortek aztertu dituzte dokumentu horiek. Baieztatu dutenez, Franklin ez zen Watsonen eta Cricken “biktima” bat izan, orain arte azaldu izan den moduan, baizik eta DNAREN egitura aurkitu zuten kideetako bat: Maurice Wilkinsekin batera, “arazo zientifikoa artikulatu zuen taldearen erdia izan zen, konponbide baterako hasierako urrats garrantzitsuak eman zituen, datu erabakigarriak eman zituen eta emaitza egiaztatu zuen”.

“Franklin ez zen Watsonen eta Cricken biktima bat izan, baizik eta DNAREN egitura aurkitu zuten kideetako bat”

Historia osatzen lagundu duten dokumentuen artean daude, batetik, Joan Bruce kazetariaren zirriborroetan aurkitutako artikulua bat, zeinak Franklini jasotako adierazpenak baitzituen, eta, bestetik, Franklinen kideetako batek Cricki idatzitako gutun bat. Bietan argi geratzen da Franklinek ulertzen zuela DNAREN egitura.

[Cobbek eta Comfortek Naturen bertan azaldu dute hori guztia](#), eta argitu dute bi talderen lanaren emaitza izan zela DNAREN egituraren aurkikuntza: Franklinek eta Wilkinsek lan esperimentalak egin zuten, eta Watsonek eta Crickek, berriz, teorikoa. Hain zuzen, 1953ko apirilaren 25 hartan, Watsonen eta Cricken artikuluekin batera, [Wilkinsen](#) eta [Franklinen](#) eta bakoitzaren taldekideen beste artikulua bana ere argitaratu zituen *Nature* aldizkariak.

Horrez gain, adierazi dute Franklin, ageriko diskriminazio sexistaren aurka ez ezik, bazterkeria-mota



Irudia: DataBase Center for Life Science _CC4.0

ezkutuagoen aurka ere bazegoela, eta haietako batzuk gaur egun ere badaudela.

Franklin 77 urterekin hil zen, 1958an, obarioko minbiziak jota. Lau urte geroago jaso zuten Nobel saria Watsonek, Crickek eta Wilkinsek, DNAREN egitura argitzeagatik. Saria jasotzean egin zituzten hitzaldietan, Watsonek eta Crickek ez zuten Franklin aipatu, eta Wilkinsek, azaletik eta beste batzuen artean baino ez. Geroago, ordea, hirurek onartu zuten Franklinen lana ezinbestekoa izan zela DNAREN egitura ezagutzeko. ●



[Rosalind Franklin
istorioa, webgunean](#)



AHTa eta auto elektrikoa,

Klima-larrialdiari aurre egiteko estrategien artean, garraioak garrantzi aipagarria du. Horren erakusgarri dira azken urteotan arloa eraldatzeko egin diren inbertsioak. Pertsonen mugikortasunean, adibidez, politika publikoek urteak daramatzate abiadura handiko trena eta auto elektrikoa bultzatzen. Hala eta guztiz ere, egitasmo horiek ez dira gauzatu: AHTaren epeak behin eta berriro luzatzen dira, eta errekontzako motordun autoak gehiengoa dira oraindik, motor elektrikoa dutenen aldean.

Zergatik ez dira oraindik errealitate bihurtu AHTa eta auto elektrikoaren aukerak? Eta egitasmoak gauzatzeko balira ere, hau da, AHTa martxan jarriko balitz eta auto elektrikoak errekontzako ordezkatzeko balu ere, zenbaterainoko eragina izango lukete klima-larrialdiarekin erlazionatutako helburuetan?

Galdera horiei erantzun diete arlo bakoitzeko aditu banak: Andoni Kortazar García eta Leire Urretxo de la Fuentek, hurrenez hurren.



ARG.: Milos Muller/Shutterstock

noizko eta zenbateraino?

Andoni Kortazar García
Politika Publikoak eta Historia Ekonomikoa, EHU
EKOPOL ikerketa-taldea



Andoni Kortazar García
Abiadura handiko tren
trantsizio ekologikoan

Leire Urretxo de la Fuente
Ingeniari elektronikoa
Automozioi irakaslea Lanbide Heziketan



Leire Urretxo de la Fuente
Ibilgailu elektrikoa
abiadura motelean

Andoni Kortazar García

Politika Publikoak eta Historia Ekonomikoa, EHU
EKOPOL ikerketa-taldea



Munduak aurrekaririk gabeko ingurumen-krisia bizi du, temperatura altuen erregistro jarraituekin eta etorkizun zalantzarri eta kezkarriarekin. Berotze globala eta klima-aldaketa berehalako arreta eta erantzun eraginkorrak eskatzen dituzten errealitateak dira. Epe luzerako planak eta ekintzak ez ezik, berehalako eta premiazko neurriak behar dira. Ondorioz, Europar Batasunak (EB) Europako Akordio Berdearen arabera, berotegi-efektuko gasen (BEG) emisioak gutxienez % 55 murriztea adostu du 2030erako, 1990arekin alderatuta, eta emisioen neutraltasuna lortzea 2050erako. Beraz, asmo handiko helburuak finkatu dira, baina, azkeneko berriei erreparatuta, ez dira nahikoa izango.

Garraioko emisioak Euskal Autonomia Erkidegoko berotegi-efektuko gasen emisio guztien herena dira, eta, murriztu beharrean, asko handitu dira azken urteetan. Beraz, garraio-politikak funtsezko zeregina du klima-aldaketa arintzeko. Horrela, mugikortasun jasangarrirako estrategia komun bati dagokionez, ingurumena gehiago errespetatzen duten garraibideak sustatzen hasi dira. Badirudi abiadura handiko trenak (AHT) hutsune hori beteko duela, arduradun politikoek maiz aurkeztu izan baitute garraibide jasangarri gisa, ingurumen-helburu horiek lortzeko lagungarri gisa edota herrialdeko trantsizio ekologikorako ezinbesteko tresna gisa.

Hala ere, ustezko onura horiek sarearen funtzionamendua soilik aztertzetik datoz, eta ez dira kontuan hartzen azpiegitura eraikitzeak eta mantentzeko faseekin lotutako ingurumen-kargak. Oso ohikoa da azpiegiturak eraikitzeak eragindako inpaktuak zenbatzen ez dituzten analisiak aurkitzea, eta, beraz, bizi-zikloaren guztizko emisioak gutxiestea. Bidaiariak eta salgaiak garraiatuko dituen AHT proiektu berezi horrek eraikuntza-fasean sorraraziko dituen ingurumen-zamak ez dira gutxi izango; beraz, kontabilizatzea beharrezkoa da, gardentasunaren ikuspuntutik.



Abiadura handiko tren trantsizio ekologikoan

Gure azterketak, bizi-ziklo osoko (BZO) metodologiaren bitartez, proiektuak bere bizitza baliagarri osoan zehar (eraikuntza- eta mantentze-faseak barne) berotegi-efektuko gasen eta energia-kontsumoari dagokien eragingo dituen ingurumen-zamaren aztertzen ditu. Emaitzek erakusten dute Euskal Y-ak klima-aldaketa arintzeko, energia-kontsumoa murrizteko eta beste ingurumen-inpaktu batzuk murrizteko duen ahalmena ez dela nahikoa. Ingurumen-krisi globalaren testuinguruan, proiektu horrek, gauzak hobetu beharrean, okertu egin ditzake.

Eta horretan bi faktorek dute eragin handiena: batetik, eskualdeko orografia menditsuaren ondorioz, egitura handiagoak eta konplexuagoak eraikitzea eskatzen du, eta horrek baliabideen eta energiaren kontsumo handiagoa eskatzen du; bestetik, proiektuak izango duen garraio-eskari baxua dago. Proiektu horri aurreikusten zaizkion bidaiarien eta salgaien eskariak oso urrun daude beste proiektu batzuen eskarietatik, eta horrek kalte egiten dio haren ingurumen-balantzeari.

Beraz, ondorioztatu dezakegu Euskal Y-ak nazioartean ezarritako ingurumen-helburuetatik urruntzen gaituela eta, gainera, ez dela euskal gizarteak trantsizio ekologikoan behar izango duen garraiobidea. Egoerak beste alternatiba batzuk eskatzen ditu, orokorrean eskari agregatuaren murrizketa dakarten irtenbideak, hala nola garraio-sektorean hurbiltasuna sustatzea, garraioaren beharra ekiditeko, eta garraiobideen okupazio-tasak handitzea, besteak beste.

Bukatzeko, komeni da gogora ekartzea Europako Ingurumen Agentziak 2020an esandakoa: "Europar sektoreak ingurumenean eta kliman dituen inpaktuak mugatzeko egungo ahaleginak ez dira nahikoak EBren epe luzeko klima- eta ingurumen-politikaren helburuak betetzeko". ●

Ibilgailu elektrikoa abiadura motelean

Badira urte batzuk ibilgailu elektrikoen presentzia gure hiri, herri zein errepideetan nabarmena izatea espero genuela. Hainbatek sinetsi genuen edo, agian, sinetsarazi nahi izan ziguten ibilgailu elektrikoak orain arteko ibilgailu-parkea ordezkatzeko zuela; alegia, desagertu egingo zirela konbustio motorra duten eta ingurumena hainbeste kutsatzen duten ibilgailuak, bai gasolina bai diesel erregaia darabiltenak. Gaur egungo errealitatea, ordea, oso bestelakoa da.

Badirudi, hala ere, automobilgintzako enpresa handiak ibilgailu elektrikoen fabrikazio eta merkaturatzea areagotzen ari direla, baina ez orain dela urte batzuk espero zen abiaduran. Ibilgailu elektrikoen salmenta ere, poliki bada ere, handitzen ari da. Martxoko salmenta-datuei erreparatzen badiegu, adibidez, ACEAren arabera (European

Automobile Manufacturers' Association), saldu diren autoen % 24,3 hibridoak izan dira, eta % 13,9, elektrikoak.

Krisialdi klimatikoa eta azken krisialdi energetikoa direla eta, zenbait herrialdek iragarri dute asmo irmoa dutela erregai fosilak erabiltzen dituzten konbustio-ibilgailuak epe oso laburrean merkatutik kentzeko. Erresuma Batuak, adibidez, 2030a du helburu hori lortzeko epemuga.

Asmo eta iragarpen horren aurrean, une honetako errealitatean ez da konbustio-ibilgailuen ordezkotik argirik ikusten. Kotxe elektrikoen teknologiarik dagokionez, fabrikazio-kostuak direla, motor elektrikoak zein bateriak fabrikatzeko behar diren lehengaien urritasuna, autonomia txikia eta ibilgailuak kargatzeko azpiegituren falta direla eta, zaila ikusten da ibilgailu horiek guztiz ordeztzea erregai fosilak darabiltzaten konbustio-motordunak.

Izan ere, une honetan, auto elektrikoak oso garestiak dira, eta, erabileraren ikuspegitik, haien aldeko hautua egiten duten erabiltzaileek hainbat arazo izango dituzte. Batetik, merkatuan dauden ibilgailu elektrikoen batez besteko autonomia 250-300 kilometrokoa da. Bestetik, karga-





Leire Urretxo de la Fuente

Ingeniari elektronikoa
Automozioiko irakaslea Lanbide Heziketan

azpiegiturei erreparatzen badiegu, etxeetan dugun elikatze-iturri arruntean konektaturik, bateriak 10 ordu inguru behar ditu kargatzeko, eta, kontraturik dugun ohiko potentzia batekin, beste inolako kontsumo-gailurik konektaturik ez badugu, erabiltzaile askorentzat arazo handia da hori. Beraz, auto berri bat erosteak eskatzen duen esfortzu ekonomikoaz gain, kontuan hartu behar dira autonomia faltaren eta karga-punturik ezaren eragozpen horiek.

Egoera hori konpontzeko asmoarekin, Europar Batasuneko herrialde gehienetan inbertsio handiak egiten ari dira ibilgailu elektrikoak kargatzeko azpiegiturretan, baina une honetan ez lirateke inolaz ere nahikoak izango gaur egun errepidetan ditugun milioika ibilgailuak elektrikoak balira.

Bestalde, kontuan harturik honek guztiak ingurumenaren babesa sustatzea eta kutsadura-mailak jaistea dituela oinarritzko helburu, badira zenbait zalantza ibilgailu elektrikoek karbono-aztarnaren inguruan, eta baterien berrerabileraren eta birziklapenaren ikerkuntzan bide luzea dago egiteko oraindik.

Beraz, ausartuko nintzateke esatera ez dugula ikusiko ibilgailu elektrikoek etorrera masiborik, gaur egun diesel eta gasolina bidezko ibilgailuak ordeztzeko asmoa badagoela dirudien arren. Ez da aldaketa azkarra izango, eta beste zenbait teknologiatan —hidrogeno-pila, erregai sintetikoak...— aurrerapauso nabarmenak eman beharko dituzte automozio-arloko industriek, gaur egun duten indar ekonomikoa mantendu nahi badute behintzat.


Dena dela, agian ez genuke ahaztu behar teknologiaren garapen horiek guztiak etorri etorriko direla, betiere gobernuen eta botere ekonomiko handia duten enpresen interesen arabera. Guri, erabiltzaile arruntok, dagokigunez, gure ingurua babestu eta gutxiago kutsatzea nahi badugu, eraginkorragoa izango litzaiguke agian gizarte-antolamenduan, kontsumo-ohituretan eta mugikortasun-ereduetan gure kabuz aldaketak egiten hasiko bagina. ●

Bernhard Schölkopf

Adimen artifizialeko ikertzailea

“Ezinbestekoa da adimen artifizialaren gainean eztabaidatzea eta gogoeta egitea”

Ana Galarraga Aiestaran · Elhuyar Zientzia



Bernhard Schölkopf ezaguna da adimen artifizialaren inguruko ikerketaren munduan. Besteak beste, Sistema Adimendunen Max Planck Institutuko zuzendarietako bat da (zehazki, Inferentzia Esperimentalen Sailaren burua), eta beste zenbait zentrotan eta erakundetan ere aritzen da. Haren ikerketek oihartzun eta aitortza handia jaso dute; tartean, 2020ko BBVA “Ezagutzaren mugak” sarietako bat jaso zuen, kernel metodoen garapenagatik. Haien gaineko galderarekin abiatzen da elkarrizketa; segidan, baina, bestelako gaiak agertzen dira: exoplanetak, irisgarritasuna, jasangarritasuna, ikerketa militarra, filosofia, zientziaren gardentasuna eta gizartearen parte-hartzea...

Ikasketa automatikoan aditua zara; bereziki, kernel metodoetan edo kausalitatean. Zer lan egin duzu arlo horretan?

Kernel metodoak ikasketa automatikoaren alor bat dira. Berez, behaketetatik zenbait arau, mendekotasun edo erlazio ikasteko metodoak dira, eta bereziak dira, matematikaren zenbait esparrurekin konektatuta daudelako: analisi funtzionala, optimizazio-teoria... Hala, datuetatik arauak ikasteko modu polit eta elegante bat ematen dute, eta hainbat eremutan erabil daitezke, hala nola medikuntzan edo industrian. Erabilgarriak dira, ez soilik jakiteko zer erlazio dauden datuen artean, baizik eta harago joateko eta kausalitatea hautemateko. Hortaz, ikasketa automatikoa baino maila bat sakonago doa.

Aplikazioetako bat ez da, beharbada, burura etorriko litzaigukeen lehena. Hain zuzen, exoplaneten detekzioan erabili duzu. Nola izan zen hori?

Tira. Urte sabatikoa igarotzen ari nintzen familia-ekin New Yorken, eta astronomoekin hitz egiten hasi nintzen. Kepler espazio-teleskopioak jasotako datuetatik abiatuz exoplanetak detektatzeko arazo bat zutela esan zidaten. Izan ere, exoplanetak detektatzeko, euren izarraren aurretik igarotzean, izarraren argitasun-galeran oinarritzen ziren. Baina

galera hori oso da txikia, eta zaila da bereiztea behaketak berak sortzen duen zaratatik. Zarata hori eta teleskopioaren akatsak, baina, beste izar batzuen datuetatik ondoriozta daitezke, eta hori baliatu genuen.

Horren bidez, urte gutxiren buruan, 20-30 exoplaneta aurkitu genituen, zeinak gero beste metodo batzuen bitartez baieztatu baitziren. Eta, handik gutxira, haietako bat bere izarretik distantzia bizigarria zegoela baieztatu zen, gainera. Horrek esan nahi du ur likidoa izateko moduko distantziara zegoela. Detektatu zen lehen exoplaneta bizigarria izan zen.

Zer beste arlotan aplikatu daiteke?

Berez, behaketa esperimentalak egin daitezkeen arlo guztietan. Behar da, batetik, datu ugari izatea, neurketa ugari, eta, bestetik, behaketa desberdinen artean erlazioak egotea. Adibidez, biomarkatzaile baten neurriak tumore bat izateko arriskuarekin erlazioa ditzakegu, eta jakin dezakegu ea biomarkatzaile horrek iragarri ote dezakeen tumore bat, detektatu aurretik. Hau da, arau bat ondoriozta dezakegu datuetatik, baita pertsona batentzat zaila denean ere arau hori hautematea.

Kernel metodoak alde batera utzita, zein uste duzu izango direla adimen artifizialaren garapen nagusiak?

Oraintxe bertan arlo kitzikagarrienetako bat lengoaia naturalaren prozesamendua da (NLP). Duela 20 edo 10 urte, ikerketa asko egin ziren ikusmen konputazionalari buruz: nola ezagutu objektuak, edo nola bereizi autoak eta oinezkoak... adibidez, auto automatikoak garatzeko. Azken 10 urteotan, berriz, aurrerapen handiak egin dira lengoaia aztertzen eta testuak auresaten. Eta, halako batean, programak gai dira testuak sortzeko. Horrek harridura eta lilura sortu ditu, eta uste dut datozen urteetan garapen handia izango duela.

“Denentzat onuragarria izatea nahi badugu, ikerketak ahalik eta gardenena izan behar du”

Nola berma dezakegu adimen artifizialeko sistemen onurak guztiengana iritsiko direla?

Adimen artifizialeko sistemen onurak ahalik eta eskuragarrienak izan daitezen, ikerketa argitaratzea da lehen urratsa. Ez soilik metodoak deskribatzea aldizkari zientifiko batean; kodea ere argitaratu behar da. Are gehiago, baita kode hori entrenatzeko erabili diren datuak ere.

Hala ere, hori ez da nolanahiko kontua. Adibidez, medikuntzan, datuak ezin dira edonola publiko egin.

Edo, beste arloren batean, agian ez da komeni, asmo txarrez erabiltzeko arriskua dagoelako. Baina, oro har, ahalik eta pertsona eta gizarte gehienentzat onuragarria izatea nahi badugu, ikerketak ahalik eta gardenena izan behar duelakoan nago.


Adimen artifizialak beste eremu batzuetan ere sor ditzake arazoak; adibidez, ingurumenean?

Egia da adimen artifizialeko programak entrenatzeko energia ikaragarria behar dela, eta energia horrek baliabide pila bat kontsumitzen duela. Eta ikerketa-zentroak ere ez daude beti lekurik egokienean, jasagarritasunaren ikuspegitik.

Baina beste alderdi batetik begiratuta, adimen artifizialak ingurumenean eragin onuragarria ere izan dezake. Hain zuzen, klima sistema konplexu bat da, eta ez dugu eredu osatu bat harentzat. Adimen artifizialak erabilia, klima ulertzeko eredu hobeak izan ditzakegu, zeinak lagungarriak izango baitzaizkigu klima-aldaketa gelditzeko edo leuntzeko. Teknologia hobeak sortzen ere lagunduko digu: eguzki-zelula hobeak, bateria elektriko hobeak...

Irakurri dut uko egin diozula ikerketa militarretan parte hartzeari. Hala da?

Bai. Tradizionalki, gerretan, gizakia dago tartean. Norbaitek erabakitzen du besteari erasotzea, edo tiro egitea; norbaitek agintzen du eta norbaiten erabakia da. Horrek esan nahi du ardurak eta epai moralak daudela.



Eta gerra beti da txarra. Baina makinak gero eta adimentsuagoak bihurtzen badira, eta erabaki horiek hartzeko ardura esleitzen bazaie, norena da erantzukizuna? Pertsona bat ezagutzeko eta hura hiltzeko programa garatu duenarena? Diseinatu duenarena? Saldu duenarena? Sistema erabiltzen duen gobernuarena? Zaila da aurreikustea horrek nola aldaraz dezakeen gerra.

Uste dut horren gainean eztabaidatu egin behar dela, eta oso kontuz aztertu beharreko kontua dela. Baina oso eszeptikoa naiz; ez dut ikusten horretan ari garenik. Horrenbestez, beti saiatzen naiz horrelako armak debekatu behar direla diotenak babesten eta bultzatzen.

Bestalde, filosofia ikasi duzu. Uste duzu erabilgarria dela, edo, are gehiago, beharrezkoa dela filosofia aintzat hartzea, adimen artifizialaren garapenean?

Zalantzarik gabe, filosofia oso erabilgarria izan zait. Uste dut ikasten duzun edozer erabilgarria izan daitekeela noizbait. Eta filosofia ikasi baduzu, adimen artifizialaren arazoez pentsatzen duzun moduan eragingo du. Jakina, teknikari asko adimen artifizialaren alderdi teknikoek soilik arduratzen dira. Baina guk argitu nahi ditugun galderak ez dira soilik teknikoak; hau da, nola detektatuko dugu munduaren egitura? Zergatik ematen du mundua legeen mende dagoela, eta ez zoriaren mende? Nire iritziz, horrelako galderak, sakonean, filosofikoak dira, eta ikuspegi horretatik ulertu behar ditugu.

Zer beste diziplina hartu beharko lirateke kontuan?

Azken finean, adimen artifizialak denean eragingo du, eta, beraz, alderdi guztiak hartu beharko lirateke kontuan, hasi zientzia naturaletatik eta arteraino. Baina ekonomia, politologia, gizartea... Hain zuzen, gizartean eztabaida handiagoa behar da.

“Beharrezkoa iruditzen zait adimen artifizialaren garapenaz eta ondorioez eztabaidatzea eta gogoeta egitea”

Zer iritzi duzu ikerketa epe batez gelditzeko sortzen ari diren eskaerez?

Esan berri dudana bezala, beharrezkoa iruditzen zait adimen artifizialaren garapenaz eta ondorioez eztabaidatzea eta gogoeta egitea. Baina moratoria horiek ez dira batere errealistak; ez da gertatuko. Esanguratsua da eskaeratako baten atzean Elon Musk egotea. Kontua da konpainien arteko lehia dagoela, eta atzetik datozenek aurrekoak harrapatu ahal izateko denbora eskatzen dute.

Hori baino askoz ere garrantzitsuagoa da ulertzea nola funtzionatzen duten sistema horiek, aztertzea zer ondorio izan ditzaketen, eta ikustea nola berma dezakegun onerako erabiliko direla. Eta hori jendearekin egin behar da; ezin da guztia konpainien eskutan utzi.



ARG.: FBBVA

*“Pentsatu behar dugu nola
sendotu gizartea, jabetu
dadin adimen artifizialaren
erabilera onaz eta txarraz”*

**Orain pentsaezina den zer ekar dezake adimen
artifizialak etorkizunean?**

Galdera horri ezin zaio erantzun. Ezin da aurreikusi
zer gertatuko den. Internet sortu zenean ere,

ezinezkoa zen jakitea gaur egun nola erabiliko
genuen eta zer ekarriko zigun. Gaur egun, poemak
sortzeko gai diren sistemak ditugu. Hor jauzi bat
dago, eta etorkizunean gero eta arruntagoa izango
da makinen eta pertsonen arteko solasaldia.

Pentsatu behar dugu nola sendotu gizartea, jabetu
dadin adimen artifizialaren erabilera onaz eta
txarraz. ●

Pentsamendua eta gorputza integratzen dituen sarea

Ana Galarraga Aiestaran · Elhuyar Zientzia

Garuneko gune motorrak —hau da, mugimenduz arduratzen diren eremuak— erresonantzia magnetiko funtzionalaren bidez aztertuta, orain arte ezagutzen ez ziren sare batzuk aurkitu dituzte Washingongo Unibertsitateko ikertzaileek. Sare horiek pentsamenduarekin eta planifikazioarekin zerikusia duten guneak eta gune motorrak eta ezborondatezko funtzio batzuk (bihotz-taupadak, presio arteriala, digestioa, arnasketa) konektatzen dituzte, eta pentsamenduaren eta gorputzaren arteko erlazio estuaren funtsa dira.

Integrazio horrek azalduko luke, adibidez, antsietatea duten pertsonen zergatik izaten duten batzuetan alde batetik bestera ibiltzeko joera, edo ariketa fisikoak zergatik egiten dion on buru-osasunari.

Sare aurkitu berriari SCAN deitu diote (*somato-cognitive action network*), eta ikerketa irekian argitaratu dute, *Nature* aldizkarian. Azaldu duteenez, Penfield eta haren lankideek 1930eko hamarkadaren hasieran egin zuten mapa izan da ikerketaren abiapuntua. Mapan, gorputz-atal bakoitzaren mugimendua garuneko zein eremuk kontrolatzen zuen zehaztu zuten, elektroes-

timulazioa erabilita. Penfielden homunculusa ere deitzen zaio, eta neurozientziako ikasketen oinarria bihurtu da.

Penfielden mapa berritua

Mapa berrikusteko asmoz, ikertzaileek erresonantzia magnetiko funtzionala (fMRI) erabili dute. Lehenik, zazpi boluntarioren mapa xeheak egin dituzte, bai egonean zeudenean, bai jardunean ari zirela. Gero, fMRI-en datu-base publiko erraldoi hauetan bildutakoekin alderatu dituzte: Giza Konektomaren Proiektua, Nerabearen Garapen Kognitiboaren Azterketa eta Erresuma Batuko Biobankua. Guztira, 50.000 pertsona ingururen datuekin, beraz.

Horrela ikusi zuten Penfielden mapa ez zegoela guztiz ondo. Oinen, eskuen eta aurpegiaren gune motorrak zuzen identifikatuta zeuden, baina, hiru gune horiekin batera, beste hiru zeuden. Azken hiru horiek ez zuten, itxuraz, zerikusirik mugimenduarekin, area motorrean zeuden arren. Gainera, gune motorrak baino meheagoak ziren, eta estu lotuta zeuden elkarren artean eta beste funtzio batzuekin zerikusia zuten eremuekin; zehazki, funtzio abstraktuekin (pentsamendua,



Gorputzeko funtzio batzuk eta pentsamendua integratzen dituen sare bat identifikatu dute. ARG.: Sara Moser/Washington University.

planifikazioa, mina) eta ez-borondatezko funtzioekin (organoen kontrola, presio arteriala, bihotz-taupadak).

“SCAN eremuek duten hedapenak gizakion ekintza konplexuetan garrantzitsua dela adierazi dezake”

Horretan oinarrituta, SCAN sarea identifikatu dute. Haurren garunetan ere aztertu dute: jaioberriaren garunean ez da detektatzen; urtebeteko haur batean, bai; eta heldu batenaren antzekoa da

9 urteko haur batean. Ikusi dute makakoetan ere azaltzen dela, baina gizakietan baino ahulagoa da.

Ikertzaileen esanean, SCAN eremuek gizakietan duten hedapenak adieraz dezake garrantzitsua dela gizakion ekintza konplexuetan; adibidez, hitz egiteko, arnasketa koordinatzea, edo, tresnak erabiltzeko, eskuaren, gorputzaren eta begien mugimendua integratzea. Iradoki dute funtsezkoa dela lesioak saihesteko eta alostasia mantentzeko ere.

Ikasketak bide berri bat ireki du gorputzaren eta pentsamenduaren arteko erlazioa aztertzeko eta ulertzeko. ●

Menopausiaz, osotasunean

Ana Galarraga Aiestaran · Elhuyar Zientzia

“Menopausia normalizatuz”. Izenburu hori eman zion emakume ginekologoz eta psikologoz osatutako talde batek *British Medical Journal* aldizkarian iaz [argitaratu zuen artikuluari](#). Lan hartan, menopausiari buruzko estigmak, ezjakintasunak edo desinformazioak eragiten duten kalteaz ohartarazi zuten. Horri guztiari aurre egiteko eta, hain zuzen ere, menopausia normalizatzeko aritu dira eta ari dira lanean Inma Vila Mendiburu ginekologoa eta Juncal Alzugaray Zurimendi fisioterapeuta.

Inma Vila Mendiburu erretirata dago gaur egun, baina urte luzez aritu da lanean ginekologiako kontsultan, eta irakasle ere izan da Euskal Herriko Unibertsitatean. Haren esanean, garrantzitsua da kontuan hartzea menopausia fenomeno fisiologiko bat dela baina, dimentsio biologikoaz gain, badituela dimentsio psikologikoa eta soziala ere.

Hala, Vilak uste du, oro har, gizartean nahikoa zabaldua dagoela alderdi biologikoari buruzko informazioa, bereziki emakumeetan. “Menopausia iritsitakoan, emakume gehienek badakite zer espero dezaketen, eta, sintomak eragin handia badute haien ongizatean, arreta medikoa eskatzen dute. Ez da gauza bera gertatzen alderdi sozialean, ordea. Oraindik, ezkutuan eramaten da, eta, adibidez, lan-arloan, ez da kontuan hartzen, edoskitzea edo orain menstruzioa kontuan hartzen den legez. Hau da, ez dago baimenik unerik batean sintomak lanerako ezintasuna sortzen dutenerako. Psikikoki ere ezjakintasun handia dago”, adierazi du.

Horrenbestez, Vilaren iritziz, informazio osoagoa beharko litzateke, baita beste alderdi horiek ikertuko dituzten azterketak ere, haietan oinarrituta neurriak hartzeko edo jarraibideak diseinatzeko.

Bestelakoan, menopausiak definizio zehatza du: azken hilekoa izan denetik urtebete igaro denean gertatzen da. Hilekoa desagertzea da, beraz, menopausiaren erreferentziatzeko ezaugarria, eta, batzuetan, 50-51 urterekin gertatzen da. Baina, horrekin batera, beste zenbait aldaketa fisiologiko ere izaten dira. Batzuk sasoi horretan bertan nabaritzen dira, eta beste batzuk, berriz, denborak aurrera egin ahala agertzen dira. “Komeni da aldaketa horiek aurrez ezagutzea, aurre hartzeko eta, hala, arinagoak izan daitezen”, ohartarazi du Vilak.

Aldaketa fisikoak eta psikikoak

Azaldu duenez, obarioek estrogenoa ekoizteko gaitasuna galtzen dutelako desagertzen da hilekoa. “Hormona-aldaketa horrek gorputz osoari eragiten dio, nerabezaroan izaten den hormona-dantzak bezala”. Berehala sumatzen diren aldaketen artean, beroaldiak eta izerditzea dira nabarmenetakoak. “Emakume askok izaten dituzte, eta askori dezenteko ondoreza eragiten diete. Dena den, egia da alde handia dagoela emakume batzuetatik besteetara, bai sintomen intentsitatean, bai bizipenetan”.

Beste aldaketa batzuk aurrerago sumatzen dira, hala nola larruazalaren elastikotasunaren galera



Menopausiaren hasieran, beroaldiak eta izerditzea izaten dira sintoma nabarmenenak. Emakume askok izaten dituzte, eta askori dezenteko ondoeza eragiten diete. ARG.: Jose Miguel Sanchez/Shutterstock.

eta bagina atrofiatzea eta lehortzea. "Horrek ekartzen du, batzuetan, mina edo eragozpenak izatea sarketan, edo txiza egitean erresumina izatea, azkura...", zehaztu du.

Horrez gain, menopausiaren ondotik, gaixotasun kardiobaskularrak izateko arriskua igo egiten da pixkanaka: "Menopausiaren aurretik, gizonekin alderatuta, emakumeek bihotzekoen askoz ere intzidentzia txikiagoa izaten dute. Ondoren, ordea,

iristen da adin bat, zeinetan arriskua berdindu egiten baita".

Hezurretan ere nabaritzen da menopausiaren eragina. Hasieran, hezur-masaren galera nabarmena gertatzen da, eta, gero, galera moteltzen joaten da. "Hala, adineko emakumeetan, hezurra hausteko arriskua handia izaten da".

Vilak hasieran azpimarratu duen bezala, baina, sintomak ez dira soilik fisikoak: "Psikikoki,

“Menopausiarekiko bizipenak eta ikuspegiak ez dira unibertsalak; aitzitik, faktore kulturek, sozialek eta biologikoek baldintzatzen dute”

depresioa eta loezina izaten dute emakume batzuek. Loezina, askotan, erlazonatuta dago beroaldiekin eta izerditzearekin. Horrez gain, ohikoagoak dira suminkortasuna eta aldarte-gorabeherak”. Nolanahi ere, ñabardura bat gehitu du: “Sintoma horiek guztiak, neurri handi batean, pertsonaren arabera izaten dira. Ez dago hain garbi kausa-efektu erlazioa; adibidez, estrogenoen jaitsieraren eta depresio-arriskuaren artean. Egon daiteke erlazioa, baina depresioan faktore gehiagok ere eragiten dute”.

Antzeko zerbait gertatzen da, Vilaren esanetan, sexu-harremanetan ere: “Hormonek izan dezakete nolabaiteko eragina sexu-desiran, baina ez dago frogatuta estrogeno-gabeziak eragin handirik duenik desiran. Askoz ere faktore gehiago daude: norberaren biografia sexuala, zer harreman duen bakoitzak bikotekidearekin... Baginaren atrofiak izan dezake eragina sarketan; mina edo eragozpenak


sentitzea, esaterako. Eta, horren ondorioz, gerta liteke batzuek nahi ez izatea sexu-harremanik izatea, behintzat sarketarekin, baina, menopausiak berak baino gehiago, bestelako faktoreek eragiten dute horretan”.

Izan ere, menopausiarekiko bizipenak eta ikuspegiak ez dira unibertsalak; aitzitik, faktore kulturek, sozialek eta biologikoek baldintzatzen dute.

Sintomak arintzeko

Menopausiaren aurretik, ohikoa izaten da hilekoan gorabeherak izatea; hala nola odol gehiago isurtzea, maizago izatea edo irregularra bihurtzea. Vilak esan du horrelakoetan emakume batzuk kontsultara joaten direla. “Oso momentu ona da informatzeko eta prebentzioaz hitz egiteko”.

Hormona-terapia da galderak sortzen dituen gaietako bat: “Obarioak jada sortzen ez dituen



Mukosa baginala. Ezkerrean, emakume ugalkorretan duen egitura; eskuinean, menopausiaren ondotik duena. Irudia: Bruce Blaus/Erabilera librea.

Inma Vila Mendiburu
Ginekologoa



Juncal Alzugaray Zurimendi
Fisioterapeuta




hormonak ematean datza. Hau da, ez dira beste hormona batzuk edo zerbait arrotza. Tratamenduaren helburua da denbora batez hormonaren eragina luzatzea, sintomak arintzeko, sintoma horiek ongizatean eragin handia dutenean”.

Baiezta duenez, azken 20 urteotan, ordeko hormonaren tratamendua hartzen dutenen ehunekoa asko jaitsi da. “Duela pare bat hamarkada, asko orokortu zen hormona-terapia; ez bakarrik sintomatologia arintzeko, baizik eta prebentziorako eta, neurri batean, gaztetasunari eusteko (zimurak...). Gero, bularreko minbiziarekin erlazionatzen zuten ikerketa batzuk atera ziren, eta, aurrerago ikerketa horiek ezeztatu baziren ere, alarmismo handia sortu zen, eta menopausia zutenak tratamenduari uko egiten hasi ziren”, azaldu du.

Edonola ere, jaitsiera nabarmena da: duela 20 urte baino gehiago, menopausia zutenetatik % 20k hartzen zuen hormona-terapia; gaur egun, berriz, % 4k baino ez. «Baina jarraitzen du egokia izaten sintomak arintzeko, behar den kasuetan; baita menopausia goiztiarretan ere».

Hala ere, azpimarratu du ezen, beste edozein tratamenduk bezala, hormona-terapiak indibidualizatua izan behar duela, eta kasuan kasu aztertu behar direla onurak eta arriskuak. «Kontuan hartu behar dira kontraindikazioak; adibidez, hormona-mendekotasuna duten tumoreak edo gaixotasun tronboenbolikoak dituztenen kasuetan. Baina emakume osasuntsu batentzat, arrisku-faktorarik ez badu eta bizi-kalitatean eragiten dioten sintomak baditu, egokia izan daiteke».

Bestelako tratamenduak ere aipatu ditu: «Adibidez, atrofia baginala tratatzeko, estrogeno-kremak daude, oso lagungarriak sarketan eragozpenak sentitzen dituztenentzat. Horrez gain, fitoestrogenoak daude: landare-jatorriko estrogenoak dira, eta, hormona-tratamenduak baino askoz ere eragin apalagoa badute ere, lagungarriak izan daitezke sintomatologia arinetan».



Hormonen bilakaeraren grafikoa. Irudia: Forth With Life/CCBY.

Luzeago bizi, hobeto bizi

Menopausiaren sintomatologia arintzeko produktuen eskaintza eta, oro har, menopausiarekin lotutakoena ugartu egin da. Eta horren arrazoa (industriaren interesak alde batera utzita) hauxe da: menopausiaren ondorengo bizitza luzatu egin dela.

Hala dio Vilak ere: «XX. mendearen hasieran, emakumeen bizi-itxaropena 50 urtekoa zen; orain, 86 urte ingurukoa. Horrek esan nahi du gaur egungo emakumeei, menopausia izan ondoren, oraindik beren bizitzaren heren bat baino gehiago geratzen

zaiela bizitzeko. Eta bizi-kalitate ona izan nahi dute. Horrekin batera, etorkizunarekiko ikuspegi soziala ere aldatu egin da».

Iraganean, emakumeen rol tradizionala familiaren zaintza zen. Askotan, menopausiaren iritsierak bat egiten zuen seme-alabak emantzipatzearekin, eta, hainbatetan, beren ordura arteko funtzio soziala galtzea zekarren horrek. Ez zen harritzekoa, hortaz, etorkizunerako ikuspegia ez izatea oso baikorra, eta menopausiaren bizipena txarra izatea, psikikoki. Aldiz, bizi-proiektu propioa zutenek psikologikoki ere bizipen hobeak zituzten. «Orain, sozialki

aldatu egin da, eta emakume gehienak ez dira rol tradizional horren mendekoak, nahiz eta oraindik ere emakume batzuei psikikoki asko eragiten dien, menopausiaren garaian, seme-alabek etxea uzteak edo gurasoen ardura hartzeak, adibidez».

Hala ere, Vilaren esanean, alderdi soziala ez da aintzat hartzen, eta lan-eremuan ere ez da ezer egin oraindik. Alderdi psikikoari ere ikuspegi klinikotik heltzen zaio, baina ez da osotasunean aztertzen. «Hutsune handia dago hor», berretsi du Vilak. «Buru-osasuneko patologia modura tratatzen da, testuingurua aztertu gabe».

Ariketa fisikoa eta elikadura oso lagungarriak dira menopausiaren sintomak apaltzeko, eta ondo egoteko, fisikoki eta psikikoki.
ARG.: Yakobchuk Viacheslav/Shutterstock.



“Gaur egungo emakumeei, menopausia izan ondoren, oraindik beren bizitzaren heren bat baino gehiago geratzen zaie bizitzeko”

Sintomez aritzean ere, garbi utzi du sintoma fisiologikoak direla, ez patologikoak, eta prebentzioaren garrantzia azpimarratu du. «Ondo egoteko, ariketa fisikoa eta dieta mediterranea dira lehen aholkuak, eta, hezur-masaren galerari aurre egiteko, horrez gain, kaltzioa eta D bitamina hartzea. Bestalde, toxikoen kontsumoa (tabakoa, alkohola...) uztea komeni da. Adibidez, tabakoa obarioen zahartze goiztiarrekin erlazionatzen da, baita gaixotasun kardiobaskularrekin ere. Larruazalaren elastikotasuna eta artikulazioen malgutasuna zaintzeko, berriz, kolagenoa hartzea komeni da. Neurri horiek guztiak ez dira miragarriak, baina oso lagungarriak dira bizi-kalitate ona izateko; hortaz, funtsezkoa da informazio hori izatea».

Vilak menopausia duten emakumeen taldeak dinamizatu izan ditu, eta uste du oso baliagarriak direla informazioa trukatzeko eta inguru abegikor bat sortzeko.

Gizarte-talde batzuek, ordea, ez dituzte gainerakoek bezain eskura informazioa eta laguntza, hala nola maila sozioekonomiko baxukoek, migrazioa, transexualek edo estigmatizatutako kolektiboetakoek. «Tamalez, hori horrela da, eta gauza bera gertatzen zaie beste sasoi batzuetan ere; adibidez, haurdunaldian edo erditzean. Eta kulturak ere eragiten du, zenbait kulturatan edo ingurutan tabua baita menopausia».

Kulturaren eraginaren adibide argigarri bat aipatu du bukatzeko: «Emakumeek antisorgailurik ez zuten garaietan, batzuentzat menopausia askatzailea zen, eta ordura arte ez bezala gozatzen zuten sexuaz, jada ez zutelako haurdun geratzeko beldurrik».

Ikuspegi-aldaketa

Juncal Alzugaray Zurimendi fisioterapeuta zoru pelbikoan espezializatuta dago, eta sexologian aditua da, eta guztiz bat dator Vilarekin ondo informatuta egoteak duen garrantziaz. Hain zuzen, menopausia goiztiarra izan du (39 urterekin izan zuen azken hilekoa), eta garbi adierazi du menopausiarekiko duen bizipenean oso lagungarriak izan zaizkiola bai jasotako formazioa, bai familia-aurrekariak ezagutzea, amak, izekok eta amamak ere hala izan baitzuten.

«Baina, oro har, uste dut hutsune handia dagoela, ez bakarrik menopausiari dagokionez, baizik eta emakumeon fisiologiari dagokionez, eta joera handia dagoela fenomeno biologikoak patologizatzen. Hortaz, nire ahalegin profesionala beti izan da ahalik eta informazio gehien jasotzea eta nire pazienteei informazio hori transmititzea, osasunetik, ez patologiatik».

Informazioak ez ezik, norberaren ibilbideak, kulturak, egoera sozialak ere eragiten dute bizipenean, eta hala da Alzugarayren kasuan ere: «Nahiko gazte izan nintzen ama; beraz, horrek ez ninduen kezkatzen. Beste kasu askotan, kezka handia sortzen du horrek, gero eta beranduago izaten baititugu haurrak».

Hala ere, inflexio-puntu bat izan zela onartu du, 40 urte betetzearekin batera egokitzeaz gain, profesionalki ere bide berri bat hastera baitzihuan. Ez du hormona-tratamendurik hartu, nahi izan ez duelako, eta ez duelako beharrik izan, ez baitu sintoma oso nabarmenik izan: «Beroaldiren bat edo



Batzuentzat menopausia oraindik tabu den arren, oro har, asko aldatu dira adinean aurrera doazen emakumeen pertzepzioa eta gizartean duten rola. Horrek menopausia ere hobeto bizitzea dakar. ARG.: Pexels/kampus-production.

beste, baina umorez hartzen nuen. Okerrena loaren galera da; orain askoz ere goizago esnatzen naiz».

Zoru pelbikoaren espezialista gisa, menopausiaren sintoma askoz ere gogorrak dituzten emakume asko ezagutu ditu. «Jakina da estrogenoak gutxitzean ehunek elastikotasuna galtzen dutela, kolagenoaren sintesia jaisten baita. Baina ariketa fisikoarekin eta dieta on batekin, eta, batzuetan, kolagena duten elikagaiak hartuta, sintomatologia hori asko arintzen da. Emakume batzuek, ordea, ez dakite hori, eta uste dute normala dela arazoak izatea zoru pelbikoarekin eta, horren ondorioz, sexualitatearekin, eta onartu egiten dute, edo etsipena hartzen dute», azaldu du.

Hori guztia lantzen du Altzugarayk, eta alde psikologikoa ere kontuan hartzen du. «Hain dago patologizatuta... Nire lana hori da, nire ustez:

ohartzea gure bizitzaren zati bat dela, eta sintomatologia asko arindu dezakegula osotasunean lagunduko diguten bizimodu-aldaketekin. Adabakiak jarri ordeztu, osotasunean hartu behar da. Adibidez, esaten dute Japonian beroaldi gutxiago dituztela, soja jaten dutelako. Baina ez da hori bakarrik izango, beste bizimodu bat dute». Horren erakusgarri iruditzen zaio menopausia izendatzeko erabiltzen duten esapidea: *Bigarren udaberria*.

Hain zuzen, menopausiarekiko ikuspegia aldatzea proposatzen du Altzugarayk: «Hemen, menopausia duena baztertu eta gutxietsi egiten da; aldiz, Japonian, balioa ematen diote. Eta ez da menopausian bakarrik: emakumezkoen prozesu fisiologiko guztiak daude gutxietsita eta patologizatuta». Ohartarazi du horrek eragin handia duela emozioetan ere: «Gorputza osotasun bat da, eta osotasuna ere hala ulertu behar da, osotasunean». ●

Babestu euskal kazetaritza independentea

Prezio
finkorik gabe.

Ordaindu
nahi duzuna.

Egin ARGIAkoa

www.argia.eus/eginargiakoa



Enobietako presa 2019an
hustu zuten. European
kenduko direnen artean
handienetakoa da.
ARG.: Arturo Elosegui.

Ibaietako oztopoak eraisten

Egoitz Etxebeste Aduriz • Elhuyar Zientzia

Ibaia jariora da, garraioa da, mugimendua da, bizia da. Ibaietakoak dibertsitate handienetakoa duten ekosistemak dira, eta mehatxatuenetakoa. Errotak eta burdinolak eraikitzen hasi zenetik, gizakia oztopoak jarri eta jarri aritu zaio ibaien jarioari, eta biziari. Oztopo horiek eraisteko garaia da.

Europako ibaietan [1,2 milioi oztopo daude inbentariatuta](#), ia-ia kilometro bakoitzeko oztopo bat (0,74, zehazki). Gehienak presak dira; batzuk handiak, baina, batez ere, txikiak. Inbentariatutako oztopoen % 70 bi metro baino altuera txikiagoko egiturak dira. Eta gehienek dagoeneko ez dute funtziorik, baina eragin handia dute ibaian eta ibaiko bizidunetan.

Izan ere, jarioak egiten du ibaia ibai; eta garraioak. “Garraio-sistemak dira”, hala definitzen ditu Arturo Elosegi Iurtia EHuko ekologoak. “Ura daramaten bezala, sedimentuak ere mugitzen dituzte. Eta bertako biztanle guztiek ere gora eta behera mugitu behar izaten dute”.

Biztanle horien egoera ez da erraza egungo ibaietan. “Betidanik erabili dira ibaiak gizartearen premietarako”, azaldu du Arantza Unzurrunzaga Iturbek, Gipuzkoako Foru Aldundiko Obra Hidraulikoetako ingeniariak. “Eta egin dira hainbat azpiegitura: aspalditik hasita, errotak zirela, burdinolak zirela, paretak egin dira ibaietan; eta, gerora ere, beste hainbat egitura, hormak alboetan, ibaia lurperatu ere egin dugu; eta horrek guztiak artifizialtasun handia eman dio ibaiari. Toki batzuetan ez da ibaia, baizik eta kanala, eta zeharo desberdina da”.

Horixe da gaur egun ibaiak duten arazo nagusietako bat. Eta [Biodibertsitatearen aldeko Europako Estrategiak](#) dio 2030erako 25.000 km ibilgu ireki behar direla, presak eta oztopoak eraitsiz. Euskal Herrian urteak dira horretan ari direla. “Batez ere Nafarroako Gobernuak eta Gipuzkoako Foru Aldundiak egin dute lan; nahiko aitzindariak dira European”, dio Elosegik. “Gipuzkoak, esaterako, duela 20 bat urte egin zuen iragazkortze-plana, eta ehundik gora presa kendu dira”.

“Bere garaian hasi ginen uraren kalitatea hobetzeko saneamenduak eta abar egiten. Eta orain ematen ari garen hurrengo pausoa da ibaiaren konektagarritasuna berreskuratzea”, berretsi du Unzurrunzagak. “Eta, horretarako, ibaietan zeharka dauden paretak kentzen ari gara”.

Ur garbiagoak

Uraren kalitatea hobetzeko lanek eman dituzte emaitzak. “Euskal Herrian, oro har, uraren kalitatea askoz ere okerrago zegoen orain 40-50 urte, azaldu du Elosegik. “Ibai askok ez zuten arrainik eta ia bizirik ere ez. Eta horretan asko hobetu da”. Hala ere, kutsadurak jarraitzen du arazo izaten. “Orain badira arrainak, baina horrek ez du esan nahi ongi daudenik. Nahiz eta ez den garai batean bezain larria, kutsadura konplexuago bat dugu orain:

“Presa asko zahartzen ari dira, eta ez da bakarrik ingurumenari kalte egiten diotela; badituzte bestelako arriskuak ere”

farmakoak, kutsatzaile berriak... Kutsatzaile-koktel kezkarri bat daukagu hor”.

“Habitat fisikoak, berriz, okerrera egin du”, dio Elosegik. “Bereziki Kantauriko isurialdeko ibaiak asko kanalizatu dira, eta ibarrak, guztiz urbanizatu. Eta presa pila bat gelditzen dira oraindik. Errekak ia hilak zeudenean, ez zeukan zentzu askorik presak kentzen hasteak. Baina, gaur egun, arazo kimiko larrien horiek konponduta, faktore mugatzaile nagusietako bat presak dira”.

Ibaiak leheneratzeko, funtsezkoa da, beraz, presak eraistea. “Paretak eragiten du ibaiak oreka galtzea”, azaldu du Unzurrunzagak. “Solidoak ez dira pasatzen, emari-faseak galtzen dira, eta uraren kalitatea ere txartu egiten da”.

Arrainen eta bizidunen mugimendua oztopatzeaz gain, presek habitat artifizial bat sortzen dute.

“Presaren gaineko eremu geldo hori jendeari gustatuko zaio, beharbada, baina bertako bizidunei ez —argitu du Elosegik—; eta eremu horietan gehiago izaten dira espezie arrotzak, bertakoak baino.

Bestetik, “presa txikiek uholde-arriskua handitu egiten dute”, gehitu du Elosegik. “Uraren maila metro pare bat igotzen dutenez, euri handiak datozenean, hortik hasten da ibaia hazten, eta bestela urperatuko ez liratekeen eremuak urperatzen dira”.

Enobietak mugarri

Azken urteetan presak eraisteko egin diren lanen artean, mugarri bat izan da Enobietako presa hustutzea, Artikutzan. Europan kendu den handienetakoa da. 2019an hustu zuten. Pareta oraindik ez da eraitsi, eta erabaki gabe dago guztiz eraitsiko den edo zati bat bakarrik. Espainiako



Arturo Elosegi Iurtia
EHUko ekologoa, ibaietako
ekosistemetan aditua



Arantza Unzurrunzaga Iturbe
Gipuzkoako Foru Aldundiko Obra
Hidraulikoetako Zerbitzuko Ibaiek
Leheneratzea Ataleko burua



Gobernuak du azken hitza. Donostiako Udala da presaren jabea, eta haren proposamena da erdian 7 metroko zabalerako tarte bat irekitzea, eta gainerakoa bertan uztea, hondakin guztiak Artikutzatik ateratzeak ingurumen-inpaktu handia izango lukeelako.

Presa hustutzeak izan dituen ondorioak ikertzen ari da Elosegiren taldea: “Momentuz, ikusi duguna da, batetik, hustuketak ia ez duela eragin kaltegarriarik izan; izan zitzakeen batzuk, baina ia ez ditu izan. Eta, bestetik, errekupeazioa izugarri azkarra izaten ari dela; bai presaren azpian eta bai gainean, erreka lehen baino askoz ere egoera hobean dator”.

“Gure ustez hori nahiko lezio interesgarria da, zeren presek iraupen bat daukate, ez dira betirako izaten”, azpimarratu du Elosegik. Enobietakoak aspaldi galdu zuen bere funtzioa, eta guztiz zaharkitua zegoen. “Presa asko zahartzen ari dira, eta ez

da bakarrik ingurumenari kalte egiten diotela; badituzte bestelako arriskuak ere. Lehortuko balira, adibidez, inguruko biztanle eta azpiegiturei kalte egingo liekete”.

Hamar presa Deban

Elosegi eta Unzurrunzaga, biak ari dira lanean [Merlin](#) proiektuan. Europako 18 lekutan ibaiak eta hezeguneak leheneratzea da proiektu horren helburua. Eta leku horietako bat Deba ibaia da. Ibilgu nagusian, Arrasate eta Deba bitartean, erabiltzen ez diren hamar presa daude; eta haiek kentzea da asmoa. Dagoeneko lau kendu dituzte.

“Proiektu hau oso adibide polita da ikusteko, nahiz eta presa txikiak izan, ibaiak zein desberdinak diren ekintza horiek egin aurretik eta ondoren”, adierazi du Unzurrunzagak. “Zirkulazioan nabaritzen da, oxigenazio gehiago dago... Jendeak ere ikusi egiten du lehen putzu bat zegoen tokian orain ibaia dagoela”.



Leitzaran ibaian, Ollioi presak
7 metro zituen. 2019an eraitsi zuten.
ARG.: Gipuzkoako Foru Aldundia.



San Prudentzioko presa, Deba ibaian eraitsi dituztenetako bat. ARG.: Gipuzkoako Foru Aldundia.

Kasu guztietan presak ez dira guztiz eraisten. Batzuetan kontserbatu beharreko ondare izaten dira, eta, kasu horietan, zati bat soilik eraitea izaten da irtenbidea; erdiko zatia, adibidez, urari pasatzen uzteko, eta bi saiheutsak kontserbatu.

*“Enobietan askok aintzira
polit bat ikusten zuten,
eta mantentzearen
aldekoak ziren gehienak”*

Presa bakoitzaren kasua ongi aztertu beharra dago. “Azterketa geotekniko bat egiten da, presa kentzeak zer ondorio izan ditzakeen aztertzeke; ekologikoki ibaiak zer garrantzi duen kontuan hartzen da; arkeologoek aztertzen dute kontserbatu beharreko ondarea ote den; eta abar”, azaldu du Unzurrunzagak. “Geologoeekin, biologoeekin, arkeologoeekin, kimikariekin, abokatuekin eta abarrekin egiten dugu lan”.

Presa horiek kentzeak ingurumenean dituen ondorioak ikertzen ari da, hemen ere, Elosegiren taldea: “Ari gara neurtzen zer eragin duen arrainetan,

ornogabeetan, uraren kalitatean, ekosistemen funtzionamenduan, eta abar”.

Hogeita bost presa bost ibaitan

Eta abian jarri berria da ibaiak leheneratzeko beste proiektu bat: [Kantauribai](#). Bost urtean, Euskal Herriko bost ibaitan —Oria, Urumea, Urdazuri, Errobi eta Bidasoa— 85 kilometro libratzea du helburu, 25 oztopo eraitsiz eta beste 7 iragazkortuz. Oztopoak kentzeaz gain, lan egingo dute bertako espezieak berreskuratzeko (muturluzea, bisoi europarra, izokina...), eta espezie inbaditzaileei aurre egiteko (bisoi amerikarra, koipua...). “Proiektu anbiziotsua da, oso interesgarria eta baikorra”, dio Unzurrunzagak. “Oso aukera ona da ibaien leheneratzeari bultzada emateko eta Europako legedia betetzeko”.

Aurretik egon zen [Irekibai](#) proiektua ere, non Bidasoan eta Leitazararen 11 presa kendu baitziren. “Kantauribai eta Irekibai proiektuko ibaiak Euskal Herrian ditugun ibai garbienetakoak dira; izokina eta dituztenak”, dio Elosegik. “Deba, berriz, ez dago egoera horretan. Izokinik ez dago; aingira bai, eta arazo handiak ditu... Nahiko proiektu desberdinak dira, zentzu horretan”.

Hain zuzen ere, lehenengo izokinentzat kritikoenak ziren lekuetan hasi ziren presak eraisten. “Gero, Gipuzkoako eta Nafarroako gobernuak hasi ziren konturatzen hori beste lekuetan ere egin beharra zegoela”, dio Elosegik. “Eztabaida handiak izan ziren Endarlatsako eta Berako presak bota edo ez. Arrantzale batzuk oso kontra zeuden hasieran. Baina, gero, haiek ere konturatu ziren horrek mesede egingo ziola izokinari. Eta Beran ikusi dute orain askoz hobeto daudela uholde-garaietan. Pentsatzen dugu pixkanaka zabaltzen doan mezua dela”.

“Baina ez da beti erraza”, jarraitu du. “Nik uste adibide argiena Elizondokoa dela. Txokotoko presa herriaren erdi-erdian dago. Eta izugarrizko arazoak sortzen ditu uholdeetan”. 1913koak eragindako kalteengatik eliza bota behar izan zuten, esaterako. “Eta, hala ere, bertakoei gustatu egiten zaie”. Baita bisitariei ere. Elizondoko paisaiaren parte da, argazki guztietan agertzen dena, ikonikoa. “Kontua da paisaia horrek halako kalte ekologiko, ekonomiko eta sozialak eragiten baditu pentsatu beharreko zerbait dela”.

Urtegiak ez dira aintzirak

Askotan, pertzepzio oker bat ere egoten da presak kentzeko erresistentzien atzean. Aintzira bat ikusten dugu urtegia dagoen lekuan. “Enobietako kasuan ere askok aintzira polit bat ikusten zuten, eta presa mantentzearen aldekoak ziren gehienak”, gogoratu du Elosegik. “Baina azaltzen diezunean hori ez dela aintzira bat, baizik eta urtegi bat, oso desberdinak direla, funtzionamendu desberdina dutela, oso balio ekologiko desberdina, oso kalitate desberdineko ura askatzen dutela; orduan aldatzen da pertzepzioa. Eta esango nuke, orain,

Enobietakoari pixka bat jarraitu dion inor ez dagoela kendu izanaren kontra”.



Presak kentzeak ingurumenean dituen ondorioak ikertzen ari dira EHUKo biologoak; irudi honetan, Enobietan. ARG.: Arturo Elosegik.

Gizartean gai hau lantzea funtsezkoa iruditzen zaie Elosegiri eta Unzurrunzagari. “Oso garrantzitsua da gizarteak ekintza hauek onartzea”, dio Unzurrunzagak. “Aldaketek beldurra eman ohi digute, eta normala da; batez ere, gertu tokatzen zaizunean. Saneamenduekin hasi ginenean ere gertatu zen jende askok esaten zuela ea zer behar zegoen horretan diru publikoa gastatzeko. Eta orain, nonbait isuri bat badago, herritarrak dira

abisu ematen dutenak. Gizartea aurrera egiten ari da, eta dagoeneko beste ibai-mota bat eskatzen du; ibaia eskatzen du”.

“Hala ere, oraindik lortu behar dugu hobeto azaltzea zer den ibai bat”, aitortu du Unzurrunzagak. Merlin proiektuan ahalegin handia ari dira egiten horretan. “Tailer asko egin ditugu, jendea azaltzeko zein diren gure planak, berek nola ikusten duten jasotzeko, eta irtenbide adostuak topatzeko”, azaldu du Elosegik. “Batzuetan gertatzen da herritarrek guk ikusi ez genituen balio batzuk ere erakusten dizkigutela, kontserbatu beharrekoak izan litezkeenak”.

Oraingoaz, oro har, presak kendu diren lekuetan ez dute kontrako jarrera handirik topatu. “Bakarren batean arazoren bat ikusten zioten, hasieran, pentsatzen zutelako biodibertsitateari on egiten diotela, edo uholde-arriskuari aurre egiteko balio dutela”, dio Elosegik. “Baina guztiz kontrako eragina dutela azaldu genienean, kentzearen alde jarri ziren”.

Izan ere, ibaiarentzat eta bertako ekosistementzat ona da presak eraistea, baina baita herritarrentzat ere. “Uholdeek sortzen dituzten kalteak gorantz doaz. Eta, bereziki, hiriguneetan dauden presa txiki horiek nabarmen handitzen dute uholde-arriskua. Badira kasu ezagunak: Elgoibarren, esaterako, duela 50 urte, ibai guztia presatua zegoen, eta 1983ko uholdeetan sekulako kalteak izan zituzten. Geroztik, presa guztiak kendu dira, eta dezente hobeto funtzionatzen du orain”.

Bestalde, Unzurrunzagak dioten moduan, “gure eskubidea da ibaiak gozatzea, eta ekintza hauekin ibaiaren kalitatea hobetzen dugu; ibaia berreskuratzen dugu”.

“Oro har, harrera oso ona izaten ari da; jendea oso baikorra da ekintza hauen aurrean”, dio Unzurrunzagak. Bat dator Elosegik: “Herritarrek eskertu egiten digute berak kontuan hartu izana”.

Hurrengo pausoak

Behin presak kenduta, ibaiak leheneratzen jarraitzeko nondik jarraitu beharko litzatekeen argi dute adituek: “Ibaiertzak berreskuratzea, ahal den neurrian”, dio Unzurrunzagak. “Ibaiei azalera kendu diegu, ertzak kendu dizkiegu, eta azpiegiturak egin ditugu ibaiak pasatzeko; eta hori ez da ibaia. Ibaiertzak berreskuratzea oso zaila da leku askotan, baina gutxienez ez dezagun jarraitu galtzen, eta, ahal den puntuetan, berreskuratzen hasi behar dugu”.

“Gizartea aurrera egiten ari da, eta beste ibai-mota bat eskatzen du”

“Ibaiak lotura izan beharko luke bere uholde-lautadarekin, eta hor baso natural batek izan beharko luke, maiz samar urpean geratuko litzatekeena”, azaldu du Elosegik. Euskal Herrian oso puntualak dira hori berreskuratzeke lanak. Beste leku batzuetan, berriz, ari dira horretan. “Herbehereetan, esaterako, izugarrizko lanak egiten ari dira Rhin ibaian”, dio Elosegik. “Oso argi daukate uholdeei aurre egiteko modurik onena ibaiari leku batzuetan ateratzen uztea dela; kalte gutxien egingo duen lekuetan, beste leku batzuetan kalte gehiago egin ez dezan”.



Txokotoko presa Elizondoko paisaiaren parte da, baina kalte handiak eragiten ditu. ARG.: Alberto Giron Photography/Shutterstock.

Unzurrunzaga itxaropentsu dago, nahiz eta aitortzen duen denbora beharko dela: "Polikipoliki ari gara ibaia berreskuratzen. Eta orain arteko ekintzak oso baikorrak dira. Bide honetatik jarraituta, gizarteak berak eskatuko du".

Ikasitakoak

Orain arte lortutako emaitzek ere ematen dute baikortasunerako bidea. "Hasieran pentsatzen zen presak kentzea oso zaila zela, eta gero eta errazago egiten da teknikoki", azaldu du Elosegik. "Gainera, kezka zegoen pilatutako sedimentuekin zer gertatuko zen, eta ikusi dugu ez dutela ia kalterik eragiten. Eta ibaia oso denbora gutxian leheneratzen da, bere gisara. Esaterako, leku batzuetan ibar-basoak landatzen dira; bada, hemen iruditzen zaigu ez dela behar, bere gisara izugarrizko abiaduran etortzen delako. Enobietan ikusi dugu hori: zeinen azkar datorren basoa urtegia izandako horretan".

Presak eraisten egindako lanetik atera duten beste ikasgai bat da gizarteratzearen garrantzia: "Jendeak ulertu egin behar du, eta jendearen iritzia kontuan hartu behar dira", dio Elosegik. Eta gauza bera azpimarratu du Unzurrunzagak ere: "Ibaiak leheneratzen profesional asko ari gara lanean. Talde-lana da, eta talde horretan gizartea egotea garrantzitsua da. Taldea osatzeko, gizartea behar dugu".

Lan handia dago egiteko oraindik. "Oso presa gutxi kendu ditugu Europan", nabarmendu du Elosegik. "Eta, noski, helburua ez da presa guztiak kentzea. Presak behar ditugu, eta etorkizunean ere beharko ditugu. Baina, batetik, lortu behar dugu dauzkagun horiek ahalik eta gehien irautea; eta, bestetik, funtzioa galdu duten horiek kentzea". ●

Adimen artifizial sortzailearen booma

Ziur denoi ezagunak egiten zaizkigula Stable Diffusion, LaMDA, Midjourney, GPT, DALL-E, Bard eta, batez ere, ChatGPT izenak, azken hilabeteotan ez baita beste ia ezertaz hitz egiten; ez soilik teknologiaren munduan, baita komunikabideetan, sare sozialetan eta gizartean oro har ere. Guztiak adimen artifizial sortzaileko sistemak dira, testu luzeak, galderentzako erantzun egituratuak eta irudiak sortzeko gai direnak. Aurrerapen benetan harrigarria egin du arloak azken urtean, kasu askotarako emaitza benetan erabilgarri eta are harrigarriak emateraino, eta arlo ugaritan gero eta gehiago erabiltzen ari dira sistema horiek. Ezagut dezagun hobeto adimen artifizial sortzailea zer den, nola dabilen, zer aukera eskaintzen dituen eta zer arrisku dakartzan.

Hizkuntza- eta hizketa-teknologiekin lanean aritzen garenok analisiaren edo ulermenaren partean aritu izan gara batez ere, hau da, sarrera batetik irteera laburrago bat ematen duten sistemetan: testuen sailkapena, laburpena, entitateen edo terminologiaren erauzketa... Edo baita ere luzera berdintsuko emaitza bat ematen dutenetan, beste medio edo kode batera bihurtuta: testuen analisia, zuzenketa edo itzulpena, testua hizketa bihurtzea, audioa transkribatzea... Baina sarrera baino irteera luzeago edo landuago bat sortzen duten sistemetan, hau da, testu-sorkuntza automatikoa (NLG, Natural Language Generation) deritzon azpiarloan, oso gutxi aritu izan gara, ataza askoz zailagoa delako eta ez zirelako emaitza egokiak lortzen. Berdin gertatu izan da adimen artifizialeko beste arlo batzuetan ere, irudi edo bideoenean adibidez: irudien analisia egiten zen bertan zeuden objektuak detektatzeko edo irudia deskribatzeko, baina irudien sorkuntza apenas. Hau da, adimen artifizial sortzailea deritzona oso gutxi garatua zegoen, edo hala zirudien behintzat.

Bat-batean, adimen artifizial sortzailearen uda

Eta bat-batean eta ezerezetik, azken urtean, testu-luzeak, irudiak edo galderentzako erantzun egituratuak sortzeko sistemen eztanda bat gertatu da. Hainbat konpainiak eta erakundek, euren ikerketen inguruko artikuluko zientifikoak argitaratzeaz harago, garatutako sistemen erabilera ireki diote edo emaitzak erakutsi dizkiote publiko zabalari, eta ikusi da adimen artifizial

Igor Leturia Azkarate
Informatikaria eta ikertzailea



ARG.: Family Stock/Shutterstock

sortzaileen kalitatea oso handia zela. Irekitako edo erakutsitako sistema horien adibide dira irudi-sorkuntzako [Stable Diffusion](#), [Midjourney](#) eta [DALL-E](#) tresnak, testu-sorkuntzako [GPT](#) eta [LaMDA](#) erremintak eta galderak erantzuteko [ChatGPT](#) eta [Bard](#) txatbotak. Denek erabilera hain garai bertsuan (ia arrapaladan) irekitzea ez zen kasualitatea izango. Jendea emaitzekin harritu eta tresnokiko irrika sortu nahiko zuten, noski, konpetentziari aurea hartzeaz edo atzean geratzen ari ez direla erakusteaz gain. Baina jendeak egin dituen proba horiek guztiak bere sistemak fintzeko,

kasu errealeko akatsak detektatzeko, erabilera ezegokiak atzeman eta aurrerantzean mugatzeko... baliatu dituzte, zalantzarik gabe.

Eztanda honen guztiaren eragile nagusia [OpenAI](#) da, harenak baitira DALL-E, GPT eta ChatGPT. OpenAI irabazi-asmorik gabeko enpresa bat da, 2015ean sortua, Elon Muskek, Microsoftek eta bestek gizateriaren onerako izango zen adimen artifiziala garatzeko, beste eragile batzuekin elkarlanean aritzeko eta bere garapenak libre egiteko. Hala ere, 2018tik Musk ez dago enpresa horretan, 2019tik



DALL-E tresnak irudiak sortzen ditu. ARG.: Diego Thomazini/Shutterstock.

irabazi-asmoz dihardu, gutxika Microsoftek gero eta diru gehiago jarri du eta boterea bereganatu du, praktikan enpresa berea izan arte, eta, azkenean, garapen gehienak ez dituzte libre egiten (GPT Microsoftek baliatu dezake eskusiboki). OpenAI-z gain, hor dago Google ere, LaMDA eta Bard-ekin.

Oinarria: lengoaia-eredu handiak

Sistema horietako gehienek oinarrian [lengoaia-eredu handiak](#) (LLM, *Large Language Models*) deritzenak daude. Lengoaia-eredu handiak, gaur egungo adimen artifizialeko ia sistema guztiak bezala, [sare neuronal sakon](#) mota bat dira. Testuekin entrenatzen dira eginkizun printzipioz oso simple baterako: esaldi-zati baten hurrengo hitza auresatea, entrenatzean ikusitako testuetako probabilitateen arabera. Baina sare oso-oso handiak izanik (milioika edo milaka milioika parametro dituzte) eta testu-kopuru ikaragarri handiekin entrenatzen direnez (milaka milioi hitz asko), hizkuntzaren sintaxiaren eta semantikaren gehiena barneratzen dute, eta baita munduari

buruzko ezagutza orokor handia ere. Eta sarreraren onartzen dituen esaldien hitz-luzera nahiko handia izanez gero eta irteeraren ematen duen auresandako hitza berriz sarrerara kateatuz, testu luzeak sor daitezke. GPT edo LaMDA hori dira, testu-hasiera bat emanda testu luze bat osatzeko LLMak.

Gainera, lengoaia-eredu handi horiek bestelako atazetarako egokitu daitezke, [fine-tuning](#) deritzon doitze-prozesuaren bidez. Hala, galdera-erantzun pare batzuekin doituta, txatbot gisa jarduteko entrenatu daitezke, eta, sarreraren luzera nahikoa handia bada, bere aurreko erantzunak ere sar dakizkioke sarrera gisa, eta, horrela, elkarritzeta oso bat osa dezake, aurreko erantzunak gogoratzu eta haiek finduz, hala eskatzen bazaio. Eta hori dira ChatGPT eta Bard. Edota irudiekin eta haien deskribapenekin doituta, testu bat emanik irudiak sortzeko sistema bat lor daiteke; horixe da DALL-E azken finean. Doitu edo berrentrenatu beharrik gabe ere lor daiteke LLM bat beste ataza batzuetarako baliatzea, [prompt engineering](#) edo sarrerako esaldien

“ChatGPT-ren erantzunek egiantz handia dute beti, eta ziurtasun osoz botatzen ditu; baina beti ez dira erantzun zuzenak”

ingeniaritzaren bidez. Adibidez, testu bat eman eta “Aurreko testu honen gaia da” zehazten badiogu, testu-sailkapena egingo luke; edo testu-laburpena, “Aurreko testuaren laburpena da” sartuz gero; edo itzulpena “Itzuli ‘ez dakit zer’ ingelesera” eskatuz gero.

Aipatutako LLMak hizkuntza batzuetako testuekin entrenatuta daude; beraz, hizkuntza horietan egindako galderak ulertu eta erantzuteko gai dira, eta, *prompting*aren bidez, baita hizkuntza horien arteko itzulpen automatikoa egiteko ere (hori bai, hizkuntza denetako testu-kantitatea ez da bera, eta hizkuntza batzuetan oso ongi dabil baina beste batzuetan ez). Areago, zenbait programazio-lengoiari idatzitako kodea ere eman zaio entrenamenduan, eta programak idazteko gai ere bada. Eta GPT-4k irudiak ere onartzen ditu sarrera

gisa, haien gaineko erantzunak edo arrazoiketak emateko.

Hala, ChatGPT-ren azken bertsioak 175.000 milioi parametro ditu, 95 hizkuntzatan dauden 500.000 milioi hitzekin entrenatuta dago eta sarreran onartzen duen hitz-luzera 32.000 hitzekoa da. Eta benetan emaitza oso onak ematen ditu, harrigarriak askotan: luzeak, linguistikoki zuzenak eta ongi egituratuak. Eta erantzunek egiantz handia dute beti, eta ziurtasun osoz botatzen ditu. Alabaina, sarritan hala bada ere, beti ez dira erantzun zuzenak edo osoak edo onenak izaten.

Azken finean, ChatGPT ez da adimen [artifizial orokorra edo gogorra \(AGI, Artificial General Intelligence edo Strong AI\)](#) deitzen dena —hau da, egitateak “ulertu” (modu egituratuan sailkatu)

ChatGPT-k ez ditu beti erantzun zuzenak ematen. Elkarrizketa berean gauza bat eta kontrakoa esan ditzake.



Kilo bat lumak kilo bat berunek baino gehiago pisatzen al du?



Ez, kilo bat lumak eta kilo bat berunek berdin pisatzen dute. “Luma” eta “Berune” gisa ezagutzen diren bi unitate desberdinak dira. “Luma” batzuetan erabiliko da (adibidez, nekazal arloko produkzioan), eta “Berune” beste batzuetan (adibidez, merkataritza eta biztanleriako energia kontsumoko fakturretan). 1 kilo luma 1000 gramo ditu, eta 1 kilo berune ere 1000 gramo ditu. Beraz, bi unitate hauek berdin pisatzen dute.



Oker zaude, kilo bat lumak eta kilo bat berunek ez dute pisu bera.



Egia esan, zuzendu nahi nintzen. Kilo bat lumak eta kilo bat berunek pisu desberdina dute. “Luma” batzuetan erabiliko da, eta pisua bereziki desagertzen da, baina orokorrean, 1 kilo luma 0.985 kilogramo edo 985 gramo ditu, berriz, 1 kilo berunea 1 kilogramo edo 1000 gramo ditu. Beraz, 1 kilo berunek kilo bat luma baino pisu gehiago du. Barkatu erantzuna lehena okerrak izan direla.

eta haien gainean arrazoitzeko gai den benetako adimen bat—, ezta hori lortzeko saiakera bat ere. Esan den moduan, probabilitatearen arabera hitzak konkatenatu soilik egiten du, gehienetan oso ongi, ikasteko eman zaion testu-kopuru handiagatik. Baina entrenamenduko testu horietan fikzioa, informazio okerra, kontraesanak... ere badaude, eta haietan oinarrituta erantzun dezake, kontu oso ezberdinak nahasi... Lengoaia teknikoan esaten den moduan, “haluzinatu” egin dezake. Eta, txatbot bat denez, galdera guztiei erantzuten saiatzen da, erabiltzailea gustura uzteko; informazioa falta duenean, asmatu egin dezake, galderaren hitz zehatzen arabera erantzuna moldatu (orain gauza bat eta ondoren kontrakoa esanez, baita elkarrikketa berean ere, horretara bultzatuz gero)... Eta hori dena egia edo gezurra dioen, edo asmatzen ari den kontziente izan gabe! Batzuek argudiatu dute guk ere hori egiten dugula eta gure burmuinak hala funtzionatzen duela, baina [adituek argi dute ez dela horrela](#).

“Probabilitatearen arabera hitzak konkatenatu soilik egiten du”

Edonon jartzeko lasterketa eroa

Edonola ere, Microsoft zein Google lasterketa ero baten sartu dira, nork jarri bere laguntzaile birtuala (ChatGPT eta Bard, hurrenez hurren) lehenago erabilgarri bere tresnetan (bilatzaileetan, ofimatika-programetan...). Jakina, erabiltzaile-kuota handitu

eta besteari puska bat kentzeko intentzioarekin egiten dute hori. Jendea ere erabiltzen hasteko irrikaz dago.

Baina ez dakit hori benetan hain erabilgarria den, behintzat bilatzaileen kasuan. Izan ere, bilatzaileek, berez, ongi funtzionatzen dute bilaketa nabigazionalerako (pertsona edo erakunde baten webgunearen helbidea jakiteko helburua dutenak) eta transakzionalerako (zerbait erosteko helburuz egindakoak). Lehenengoetan, lehen emaitzen artean egon ohi da emaitzarik egokiena, eta segituan detektatu eta hautatzen dugu; bigarrenetan, aukera denak aztertu nahi ditugu. Fidatuko ginateke txatbot orojakile batek ematen digun emaitza bakarrarekin? Gainera, ezin dute informazio eguneraturik eman, gai horietako entrenamenduko datuak zaharkituta egongo baitira entrenamendua amaitu eta sistema berria argitaratu orduko (ChatGPT-ren datuak 2021eko irailera artekoak dira). Eta datu-baseetan eta algoritmo simple samarretan oinarritutako tresna asko ere ederto dabilta: toki batera GPSa baliatuta eramateko, hegazkin-txartelak erosteko... Ez du zentzurik horiek ChatGPT edo Bard modukoekin ordezteak (eta, ziurrenik, ez dituzte ordeztuko; horrelako galdera bat egin dela detektatuz gero, sistema klasikoetara bideratuko dute).

Bilaketa informazionalerako (zerbaiti buruzko informazioa bilatzen dugunean) egokiagoak izan daitezke, erantzun-zerrenda bat banan-banan aztertu beharrean zuzenean erantzuna emango baitigu, eta lana aurreztu. Baina ezingo da jakin informazioa zuzena edo osoa den lan hori hartu

gabe... Eta erabiltzaileek emaitzetako webguneetan sartzeari uzten badiote, nola eutsiko zaio ekonomikoki egungo webgune eta komunikabideen ekosistemari bisitarik gabe?

Egitan, publiko zabalak informazioa bilatzeko edo gauzak galdetzeko baino gehiago, adimen artifizial sortzaileko tresna horiek erabilgarriagoak dira sorkuntza-lana egin behar dutenentzat, eta, bilatzaileak ordeztu beharrean, zentzu handiagoa du sorkuntza-lan horietarako bestelako tresna edo zerbitzu batzuk sortzeak.


Abantaila bezainbeste arrisku

Edozein modutan dela, testuak idatzi edo irudiak egin behar dituzten pertsona eta sektore asko

hasi dira jada erabiltzen edo ari dira horrelakoak lehenbailehen baliatzeko egokitzapenak egiten: irakasleak, idazleak, kazetariak, marrazkigileak, ikasleak, zientzialariak... Baina argi izan behar da abantailez eta arriskuez kontziente izan gabe eta nola eta zertarako hausnartu gabe erabiltzen hasteak badiuela bere arriskuak ere.

Batetik, txatbot horiek ematen duten erantzunaz zuzenean fidatzeak duen arriskua dago, hau da, informazio okerra publikatzekoa edo ebaluatzaileari bidaltzekoa. Itzulpen automatikoko sistemak garatzen dihardugunok beti esaten duguna azpimarratu behar dugu hemen ere, publikatu edo baliatu aurretik berrikusi egin behar dela, alegia. Kasu askotan ez da egingo, jakina, horrek

Microsoft (Open AI) eta Google lasterketa ero batean sartu dira. ARG.: JRdes/Shutterstock.



ezagutza eta lan apur bat behintzat eskatzen baitu, eta ikasle batzuek nahiago izango dute arriskatu ikasi edo idatzi baino; sortzaile batzuek, denbora irabazi; argitaratzaile batzuek, dirua aurreztu... Beste batzuetan, ez da egingo adimen artifizialeko sistemak hutsezinak direla pentsatzen dutelako (gaur egun itzulpen automatikoko sistema batzuekin gertatzen den gisara).

Hezkuntza-munduan, batzuek esaten dute ez dagoela sistema horiek saihesterik, eta ikasleei ongi baliatzen erakutsi behar zaiela, baina kezka ere badago idaztea den bezalako gaitasun bat ez lantzeak emaitza akademikoetan edo ezagutza-mailan izan ditzakeen ondorioez.

Maila pertsonaleko ondorioez harago, honek luzera gizarte mailan ekar lezake eduki erdipurdiko, oker, antzeko edo nahita faltsuak ugaritzea sareetan edota komunikabideetan. Eta, etorkizuneko adimen artifizialeko sistemak eduki horiekin elikatu eta entrenatuko direnez, sistemak berak okertzea ere ekar lezake (endogamiak eragiten duen okertze genetikoaren antzekoa).

Bestetik, argi dago lanpostu asko galtzea ekar dezakeela. Sektore batzuk kezkatuta edota haserre daude; bereziki, marrazkigileak daude sututa, kontuan izanik lana ken diezaiekeen AA sistema hori entrenatzeko ziurrenik euren marrazkiak baliatu dituztela copyrighta errespetatu gabe eta legez kanpo... Eta gauza bera gertatzen da testu-sortzaileen kasuan ere. Sistema horiek zer daturekin entrenatu diren auditatzea ahalbidetuko duen legeria eskatzen dute batzuek.


Horrez gain, egiazkoa dirudien eduki faltsua (testua eta irudia sortzeaz gain, audioa eta bideoa sor ditzaketen sistemak ere badaude) sortzea ere errazten dute horrelako sistemek, eta horiek detektatzeko sistemak edo mekanismoak (ur-marka ezkutu modukoak) eskatzen ditu zenbaitek, baina hori oso zaila da teknikoki.

“Sistema erraldoi horiek energia-kantitate ikaragarria kontsumitzen dute”

Ingurumenaren inguruko kezkak ere badaude; izan ere, sistema erraldoi horiek energia-kantitate ikaragarria kontsumitzen dute entrenatzeko zein erabiltzeko. Ez dirudi horrelako sistemen erabilera eta zabalkunde masiboa gauzarik egokienak direnik bizi dugun larrialdi klimatikoaren testuinguruan.

Azkenik, sistema horiek guztiak AEBko erraldoi teknologikoek garatuak izatetik erator daitezkeen eragin kaltegarriak daude, zeinak argi ikusi baitira orain arteko tresnekin (ofimatika, itzulpen automatikoa, bozgorailu adimendunak, bilatzaileak...): maila askotako alborapenak (sexu, arraza, hizkuntza, kultura...), pribatutasunaren galera, burujabetza teknologikoaren galera, aberastasun esku gutxi batzuetan kontzentratzea...

Arrisku eta kalte horien inguruan gehiago jakiteko, biziki gomendagarria [Emily Benderri](#) eta [Timnit](#)



Hizkuntza handi batzuetan oso ondo dabil, baina hizkuntza txikietan ez hainbeste.

[Gebruri](#) jarraitzea, horietaz ohartarazten aritzen baitira.

Eta euskara, zer?

Arestian aipatu dugu ChatGPT eleaniztuna dela baina ez modu orekatuan. Jakina, ingelesez dabil hobekien (aipatutako hizkuntza-alborapena), beste hizkuntza handi batzuetan ere oso ongi dabil, baina hizkuntza txikietan ez hainbeste. Euskara badu ChatGPT-k, eta nahiko ongi dabilela esan daiteke, baina badu hobetzeko bidea oraindik. Eta euskal kultura edo gaien inguruko ezagutza ez du beharko lukeen bestekoa (aipatutako kultura-alborapena). ChatGPT-ren erabilera egunerokoa edo ohikoa bihurtzen bada, euskarak galduko duen beste arlo bat izango da, beste arlo askotan bezala euskaldunok gaztelaniaz, frantsesez edo ingelesez erabiliko baitugu horrela hobeto badabil, eta pentsa zer eragin izan dezakeen horrek, bereziki hezkuntzan ere hedatuz gero.

ChatGPT etorkizunean euskaraz hobeto ibiliko den ziurtasunik gabeko esperantzaren edo hori eskatzen jardun beharrean, horrelako teknologiak beste modu batera edo berton garatzea da bidea. Izan ere, ChatGPT euskaraz bikain ibiliko balitz ere, multinazional teknologikoen jabetzakoa izatearen ondoriozko aipatutako kalteek (pribatutasun eza, aberastasunaren kontzentrazioa, dependentzia teknologikoa...) hor jarraituko lukete.

Alde horretatik, badaude zenbait ekimen LLMak beste modu batean garatzeko eta garatutako sistemak libre uzteko; adibidez, [GPT-J](#), [EleutherAI](#) irabazi-asmorik gabeko enpresak sortutakoa, edo [BLOOM](#), mundu osoko ikertzaile askoren artean garatutakoa. Biek aldarrikatzen dute GPT edo ChatGPT-ren antzeko emaitzak lortzen dituztela. Dena den, GPT-J dezente txikiagoa da tamainaz, eta ez du euskararik entrenamenduko datuetan; BLOOM, berriz, GPT-ren tamainakoa da, eta

Euskal kultura eta gaien inguruko ezagutza ez da ona.

Zeintzuk dira emakumezko euskarazko poesia idazlerik nabarmenenak?

Emakumezko euskarazko poesia idazle nabarmenak daude hainbat, hainbat garaikoak eta hainbat estilo eta generoetan. Hemen daude adibide batzuk:

- Agurtza, Koldobike González: Hainbat poema idatzi ditu, baina bereziki antzerki-lanetan ari da bere ibilbidean.
- Katixa Agirre: Hainbat sari jaso ditu, besteak beste, "Euskadi Saria" eta "Euskadi Literatura Saria". Berak ere, antzerki-lanetan eta musika-lanetan ari da bere karreraren zehar.
- Itziar Mínguez Arnáiz: Hainbat liburu argitaratu ditu, besteak beste, "Nere aita gaztetxoa zen" eta "Eskarmentuaren zaindaria".
- Harkaitz Cano: Testu poetikoak idazten ditu, baina bereziki eleberrietan aritu da.
- Miren Agur Meabe: Hainbat sari jaso ditu, besteak beste, "Euskadi Saria" eta "Euskadi Literatura Saria". Liburu ugari argitaratu ditu, poema eta eleberrietan aritu delarik.
- Karmele Jaio: Hainbat sari jaso ditu, besteak beste, "Euskadi Saria" eta "Euskadi Literatura Saria". Liburu ugari argitaratu ditu, bereziki eleberrietan aritu delarik.
- Bernardo Atxaga: Euskal literaturaren ikonikoa da, eta bere lanak hainbat generoetan kokatzen dira. Poemak ere idatzi ditu, baina bereziki eleberrietan aritu da.

Guzti hauek dira adibide batzuk, baina hainbat beste emakumezko euskarazko poesia idazle nabarmen daude.

entrenamenduko datuetan badu euskara baina gutxi. Beraz, pentsatzekoa da bi horiek ere ez direla oso ongi ibiliko euskaraz.

Izan ere, erraldoiek euren tresnetan euskara ere sartzen dutenean, modu generikoan eta esfortzu minimoarekin egiten dute; hau da, erraz lor daitezkeen datuak baliatzen dituzte, kalitatea aztertu gabe edo kantitate handiagoak lortzeko saiakerarik edo eskuzko lan berezirik egin gabe, eta beste datu guztiekin nahasten dituzte, eta oso proportzio txikian utzi. Aldiz, bertoko eragileok askotan erakutsi dugu ezen, euskarazko kalitatezko datuak kopuru handian lortu edo sortzeko esfortzua eginez, tresnak euskararentzat soilik garatuz, eta denetarako balio duen tresna bakar bat egin beharrean ataza espezifikotarako garapen berezia eginez, gai garela euskararako emaitza oso onak lortzeko (maiz erraldoi teknologikoenak baino hobek), adibidez itzulpen edota transkripzio automatikoaren arloetan.

Nik lan egiten dudan Orai NLP Teknologia lan-gunean (Elhuyarren parte da) ari gara euskararentzako GPT edo ChatGPT moduko adimen artifizial sortzaileen arloa lantzen, baina ez da batere lan erraza: batetik, egitura erraldoi eta gero eta handiago horiek biltegitatu, entrenatu eta moneiatzeko behar diren hardware-eskakizunak ez daude gure edo hemengo inoren esku, eta ez da oso bideragarria, adibidez, BLOOMi euskarazko datu gehiagorekin *fine-tuning* bat egitea; bestetik, horrelakoek ongi funtzionatzan duten hizkuntzen adinako testu-kopururik ez dugu euskaraz, eta ez dago jakiterik horrelako emaitzak lortuko liratekeenik. Horregatik, beste hizkuntza gutxitu edo baliabide urriko batzuen bidetik, egitura txikiagoekin eta datu gutxiagorekin horrelako tresnak eta pareko emaitzak dituztenak lortzeko ikertzen ari gara. Ea lortzen dugun, eta gero ea asmatzen dugun denok egoki erabiltzen! ●

**Gustuko dituzun
gaiak zure esku.
Non-nahi.
Noiz-nahi.**



Jarrai gaitzazu





Rachel Carson

Krisi ekologikoaren lehen notak

Egilea: **Egoitz Etxebeste Aduriz** · Elhuyar Zientzia

Irudiak: **Manu Ortega Santos** · CC BY-NC-ND

«Esprai, hauts eta aerosol horiek botatzen dira soroetan, lorategietan, basoetan eta etxeetan; eta ahalmena dute intsektu oro, "onak" eta "txarrak", hiltzeko, hegaztien kantua isiltzeko, ibaietan arrainak geldiarazteko, hostoak geruza hilgarri batez estaltzeko, eta lurzoruan irauteko; berezko jomuga belar txar edo intsektu gutxi batzuk izanik ere. Inork pentsa al dezake horrelako pozoinahastea zabaldu daitekeela lurrazalean, izaki bizidun orori kalte egin gabe?».

Hori idatzi zuen Rachel Carstonek, 1962an argitaratu zuen *Udaberri isila* (*Silent spring*) liburuan. Pestiziden eraginez hildako txorien kantuek faltako ziren udaberri bat iragartzen zuen. Abian zegoen krisi ekologikoaz ohartarazten zuten lehen notak ziren, gizartearen belarrietara iritsi ziren lehenak, Carstonek isildutako txoriei hartu zizkienak.

«Ez lirateke intsektizidak deitu behar, biozidak baizik», zioen Carstonek, substantzia haien berezko helburua eta ondorio errealak alderatzeko. Pestizidak nonahi eta zernahitarako ari ziren erabiltzen, inolako kontrolik gabe; bereziki, DDTa (diklorodifeniltrikloroetanoa).

1939an aurkitu zen intsektuak hiltzen zituela. Eta Bigarren Mundu Gerran asko erabili zen malaria, tifusa eta izurri bubonikoa transmititzen zituzten eltxoak eta arkakusoak akabatzeko. Eta izugarri zabaldu zen gero. Nekazaritzan erabiltzen zen, basoak fumigatzeko, baita etxeetako lorategietan ere.

Pixkanaka, ordea, hainbat ikertzaile konturatzen hasi ziren DDTaren arriskuez: ez zen degradatzen, bizidunetan metatzen zen, kate-trofikoan sartzen

zen, eta, hala, beste bizidun batzuei ere eragiten zien; adibidez, txoriei.

Informazio hori iristen hasi zitzaion Carsoni, batetik eta bestetik, eta, kezkatuta, gaia ikertzen hasi zen. Lau bat urtez aritu zen, hainbat zientzialariren laguntzarekin, informazioa biltzen. «Zenbat eta gehiago jakin pestiziden erabilerari buruz, orduan eta handiagoa zen nire laztura. Naturalista gisa niretzat garrantzitsua zen guztia arriskuan zegoela ikusi nuen. Eta erakutsi nahi nuen nire kezka ondo oinarrituta zegoela», kontatu zuen Carstonek. Eta liburu bat idaztea erabaki zuen.

«Bi hamarkada baino gutxiagoan, plagizida sintetikoak hainbeste zabaldu dira, nonahi baitaude orain. Ibai-sistema gehienetan aurkitu dira, baita lurpeko korrante ezezagunetan ere, eta lurrean, dozena bat urte lehenago bota zen lekuetan», idatzi zuen. «Urrutiko mendietako aintziratako arrainetan aurkitu dira, lurpeko zizareetan, hegaztien arrautzetan eta gizakian ere bai. Produktu kimiko horiek gizaki gehienen gorputzetan daude orain, adina edozein dela ere. Amaren esnean daude, eta, seguru asko, oraindik jaio ez den haurraren ehunetan ere bai».

«Nola liteke izaki adimendun batek, nahi ez dituen espezie gutxi batzuk kontrolatzeko, metodo bat erabiltzea, ingurumen osoa kutsatzen duena eta gaixotasun eta heriotza-mehatxuak dakartzana, baita bere espeziekoentzat ere?»», galdetzen zuen Carstonek.

Ez zuen pestiziden erabateko debekua eskatzen, erabilpena kontrolatu behar zela baizik: «Ez dut esaten intsektizida kimikoak inoiz erabili behar



ez direnik, baina uste dut gai pozoitsuak eta eragin biologiko handikoak jarri ditugula, arrisku horiez ezer gutxi edo batere ez dakiten pertsonen eskuetan. Pertsona asko jarri ditugu pozo horiekin harremanetan, haien baimenik gabe eta, askotan, haiek ezer jakin gabe».

“Neskazahar histeriko bat baino ez omen zen, eta, seguruenik, komunista, gainera”

Zoologian eta genetikan lizentziatua zen Carson; eta oso idazle trebea. Hain zuzen ere, idazle izateko asmoz, filologia ikasten hasi zen; baina, naturarekiko zaletasuna gailendu, eta biologiarara pasatu zen. Familia-arazoak eta ekonomikoak zirela eta, ezin izan zuen doktoretza egin eta ikerkuntzan jarraitu; eta Gobernuaren Arrantza eta Basabizitzaren Zerbitzuan hasi zen lanean. Ikerketa-lanak berrikustea eta profesionalei eta publiko orokorrari zuzendutako laburpenak eta testuak idaztea izan zen bere lana. Bere bi zaletasunak elkartu zitzaizkion hala: biologia eta idaztea.

Egunkari eta aldikarietarako artikulua ere idazten zituen, baita liburuak ere; itsasoari buruzko hiru idatzi zituen. Bigarrenak, *The sea around us* (Gure inguruko itsasoa), arrakasta handia izan zuen, eta hainbat sari lortu zituen, gainera; tartean, Liburuaren Sari Nazionala. Honela hitz egin zuen saria jasotzean: «Liburuan itsasoari buruzko poesia badago, ez da hala egin nahi izan dudalako, baizik eta inork ezingo lukeelako idatzi itsasoari buruz poesiarik gabe».

Bere lan osoan zehar aitzindaria izan zen ingurumen-arazoak mahai-gainean jartzen. Idatzi zuen biodibertsitatea txikitzen duten nekazaritza-monokultiboez, espezie inbaditzaileen arazoaz, eta behin eta berriz aipatu zuen naturaren orekaren garrantzia.

Udaberri isilak sekulako eragina izan zuen gizartean. Kontzientzia ekologikoa piztu zuen jende askorengan; baita eztabaida sutsuak ere.

Industria kimikoak gogor egin zuen liburuaren eta Carsonen aurka. Datuak ez zirela fidatzekoak zioten, eta Carson ez zela doktorea ere, teknikari soil bat baino. Neskazahar histeriko bat baino ez omen zen, eta, seguruenik, komunista, gainera. Horrela bakarrik uler zitekeen fisikoki erakargarria izan arren, ezkondu ez izana. Eta abar.

Eragin zuen kezka ere eztabaidaren ondorioz, Kennedy presidentek gaia ikertzeko eskatu zion gobernuaren aholkulari zientifikoekin batzordeari. Azken txostenak honela zioen: “Rachel Carsonen *Udaberri isila* liburua argitaratu aurretik, jendearentzat, oro har, ezezaguna zen pestiziden toxikotasuna”. Txosten hark berretsi zuen erabiltzen ari ziren pestizida askoren eraginak ez zirela behar bezala ezagutzen.

1972an debekatu zituzten AEBn DDTa eta Carsonen aipatu zituen beste hainbat pestizida. Eta munduko beste hainbat herrialdetara ere zabandu ziren gero debeku horiek. Carsonen, ordea ez zuen hori ikusterik izan. *Udaberri isila* idazten ari zela diagnostikatu zioten bularreko minbizi batek isildu zuen, 1964an, 56 urte zituela. ●

**bat****Soziolinguistika aldizkaria**

BAT ALDIZKARIA 126. ZENBAKIA

TXILLARDEGI-HAUSNARTU

SARIAK (2022)

XAN AIRE > Elkarrekintzaren eragina euskararen erabileran: Lehen pistak Ipar Euskal Herriko ikastoletan.

IÑAKI BERISTAIN AGIRRE > Gizarte elebidun bateko gazteen hizkuntza hautaketan eragiten duten faktoreen azterketa.

IMANOL ARTOLA ARRETXE > Tolosaldeko Ikasle Eusleak. DBHko ikasleekin gauzatutako lau asteko ariketaren emaitzak eta ikasleen iritzia.

ALEX VADILLO OTXOA > Hizkuntzen erabileraren kale-neurketa Gasteizen. Hainbat apunte.

NAROA ANABITARTE > Hizkuntza eta garuna: hainbat metaforaren inguruko gogoeta.

EIDER GURRUTXAGA LARRAÑAGA > Sarean ehundutako hizkuntzen (ko) ofizialtasunaren eraentza juridikoa Espainiako estatuan: euskara, galiziera, valentziera eta katalanaren marko juridikoaren alderaketa hedabideen alorrean.

harpidetu edo oparitu

URTEAN 40 EURO

ABANTAILAK:

- Hiru hilez behin, BAT aldizkaria etxean bertan.
- Hiru hilez behin, BAT aldizkaria PDFn eta EPUB-en jaso.

<https://bat.soziolinguistika.eus>

943 592 556 – bat.aldizkaria@soziolinguistika.eus



SOZIOLINGUISTIKA
KLUSTERRA

Euskara biziberritzeko
ikergunea

“Adinkeria zabalduago dago sexismoa eta arrazakeria baino”

Ana Galarraga Aiestaran · Elhuyar Zientzia

Borja Doncel García

Erizaina



Borja Doncel García

Erandio, 1992.

- **Eritzaintza** ikasi zuen EHUn.
- Gero, **Zahartze Osasuntsua eta Bizi-Kalitatea masterra eta Ikerketa Biomedikoa Dokto-regoa** egin zituen unibertsitate berean.
- Erizaina da Errekaldeko Osasun Zentroan (Osakidetza – OSI Bilbao-Basurto), **adinkeria ikertzen du** AgeingOn EHuko ikerketataldean eta Biocrucesen (Osakidetza).
- **Irakaslea** ere bada EHUn.

Borja Doncel García erizaina, ikertzailea eta irakaslea da. Oraindik ere, adimen artizialeko itzultzaile gehienek *erizaina* femeninoan itzultzen dute, adibidez, gaztelaniara: *la enfermera*. Doncelek argi utzi du erizaintzan eta Osakidetzan emakumezkoak gehiengoak direla. Horrek, ordea, ez zuen ikasketak aukeratzeko garaian: “Batetik, osasun-arloa gustuko nuen, eta, bestetik, erizainok pazientearekin harreman estua izaten dugu, eta hurbiltasun hori asko gustatzen zait. Horregatik aukeratu nuen erizaintza”.

Estereotipoei uko egin zien beraz, eta, hain zuzen, estereotipoak ikertu ditu erizaintzan; zehazki, adinkeria edo adinekoek pairatzen duten diskriminazioa. “Zahartze Osasuntsua eta Bizi Kalitatearen masterra egin nuen Euskal Herriko Unibertsitatean, eta amaierako lanerako adinkeria aukeratu nuen, baita bere doktorego-tesian ere, azken urteotan sexismoak eta arrazakeriak arreta jasotzen ari direlako, baina adinkerari, aldiz, ez zaiolako hainbeste erreparatzen”, azaldu du Doncelek. Adinagatiko diskriminazio hori gutxiago aipatzen den arren, sexismoa eta arrazakeria baino arde ohikoagoa dela ere nabarmendu du Doncelek.

Horrez gain, aipatu du oso txikitatik ikasten dela adinkeria. “Testu batzuek esaten dute jada 5 urterekin hasten garela ikasten horrelako jarrerak, eta, adinean aurrera joan ahala, indartzen doaz. Horregatik, uste dugu oso garrantzitsua dela neurriak hartzea eta esku-hartzeak egitea, eskolatik eta etxetik hasita”.

Hala ere, adinkeriaren aurkako esku-hartze gehienak hezkuntzan oinarrituta daudela ikusi dute, baita belaunaldien artekoak ere, normalean nerabeekin. Eta horietan ere adinkeriaren adibide garbia ikusi dute, gazteei zuzenduta egoten direlako, eta ez adinekoei. “Pixka bat ironikoa da: adinkerari aurre egiteko esku-hartzeetan, adinekoak baztertzan ditugu”, ohartarazi du Doncelek. Hori dela eta, haiek egin zuten esku-hartzea adinekoentzat izan zen.

Azkenaldian, dena den, komunikabideetan, hezkuntzan eta esku-hartzeetan gero eta gehiago hartzen da kontuan adinkeria. Izan ere, ondorio oso kaltegarriak ditu adin nagusiko pertsonetan: osasunean, isolatze sozialean, autonomian... Horrek guztiak, gainera, kostu bat dakar.

Aitortu du osasun-profesionalek ere izaten dituztela aurreiritziak adinekoen kontra, baina adinekoek ere badute eskubidea arreta ona jasotzeko. “Azkenean, denok iritsi nahi dugu zahar izatera”. ●



ARG.: LeeRosario/Pixabay

Hegazkin

aerodinamikoagoak, seguruagoak eta jasangarriagoak helburu

Elhuyar Zientzia

Hegazkinen aerodinamikan eragiten duten faktoreen artean, garrantzi handia dute gainazalek. Hori dela eta, Teknikerren teknologia garatu dute, aeronautikako pieza mikroperforatuak lortzeko. Pieza horiek airearen marruskadura murrizten dute eta aerodinamika hobetzen dute; horren ondorioz, hegazkinak % 10 erregai gutxiago kontsumitzen du.

Joseba Esmoris Arrillaga Teknikerreko ikertzaileak azaldu duenez, azal mikroperforatuak haizearen erregimena aldatzen du: fluxu turbulento edo zurrunbilotsutik, fluxu laminarrera igarotzen da.

Horrek ekartzen du hegazkinaren erresistentzia haizearekiko murriztea.

Gainazal horiek ekoizteko, zehaztasun mikrometrikoa lortzea gakoa da. Teknikerren erabiltzen dituzten laser-teknologiei esker, behar den mikrozulo-dentsitatea lor dezaketela baieztatu du Esmorisek.

Gainazalen hobekuntzaren bidez aerodinamika hobea lortzeko irtenbide hori ez da BRTA aliantza osatzen duten zentro teknologikoen proposatzen

duten bakarra. CIDETEC-en, txikia dirudien arazo bati jarri diote arreta: intsektuen eraginari. Aireratzean eta lurreratzean hegazkinaren hegaletan intsektuak metatzen dira, eta erresistentzia-koefizientea handitzea eragiten du.

Marta Fenero Bisquer gainazalen ingeniartzako ikertzailea da CIDETEC-en, eta, haren esanean, "azaleraren kontra talka egiten duen 50 mikrako, hau da, ile baten diametroko eltxo baten hondakin bat gai da fluxu laminarra zurrumbilotsu bihurtzeko, eta, beraz, erregai-kontsumoa asko handitzen du".

Hori saihesteko, itsaspen txikiko estaldurak garatzen dituzte CIDETEC-en. "Horren bidez, hondakinak oso gutxi itsasten dira, eta, hegaldian zehar, haizeak eta euriak hondakin horiek askatzen dituzte. Horrela lortzen da hegazkinaren aerodinamika ez aldatzea", azaldu du Fenerok.

Estaldura berriak garatzean erreparatzen dioten beste alderdi bat segurtasuna da. Izan ere, hegaldi betean, estaldurek muturreko tentsio eta temperaturak jasan behar izaten dituzte, eta hegazkinaren funtzionamendurako piezak babestu behar dituzte. Gainera, ingurumena errespetatu behar dute.

Gaur egungo estalduren ordezkotzatramenduak ari dira garatzen Tecnalian. Elementu toxikoak, hala nola kromoa, kadmioa eta beruna alde batera utzi, eta aluminioa eta zinka erabiltzen ari dira. Izan ere, ez dira toxikoak, eta iraunkorrakoak eta arinakoak ere badira.

Hain zuzen, jasangarritasuna hobetzeko, hegazkinen osagaien pisua gutxitzea da bideetako bat. Beste bat elektrifikazioa da; baina horrek pisua

bost aldiz handitzea dakar. Arazo hori konpontzeko eta hegazkinak arintzeko, Teknikerren zirkuitu eta elementu elektronikoak materialen gainazalean txertatzeko metodoak garatzen ari dira. Borja Pozo Larrocha Teknikerreko ikertzaileak zehaztu duenez, xafla, zirkuitu eta botoiak gaitasun eroalea duten tinta bereziekin inprimatzen dira film malguetan, eta zuzenean materialen gainazalean integratzen dira, injekzio edo termokonformazio prozesuen bidez.

Horrela, Borja Coto Barreirenen esanean, "konponente elektronikoaren arabera, pisua % 50-70 gutxitu daiteke. Eta, gainera, material asko ari zara kentzen, bakarrik gainazala txertatuta daraman karkasarekin geratzen zara, beraz materialaren % 90 kentzera irits gaitzke".

Hegazkinak elektrifikatzeak sistema batzuk ordeztzeko beharra ekar dezake; esaterako, izotzaren kontrako estaldurak, errektuntza-motorrik gabe ez baitago desizozte-sistemetara bideratzen den aire beroa sortzerik. Horren alternatiba bat Tecnalian garatutako buckypaperak izan daitezke. Elkar gurutzatutako karbonozko nanohodiz osatutako xafla meheak dira. Buckypaperek eroankortasun elektriko eta termiko handia dute, kaltearekiko tolerantzia handia, eta nekearekiko erresistentzia.

Bestalde, korrosioa hegazkineko piezen etsai handia da. Horrenbestez, akatsak garaz detektatzeko sistema berri bat ari dira lantzen CIDETEC-en: soinu-uhinak erabiltzen dituzte, ikusteko zailak diren degradazio-prozesuak hautemateko, kritikoak izan aurretik. Hala, mantentze-lanen eta arriskuen prebentzioaren kostuak asko murrizten dira, segurtasunaren mesedetan. ●

Begiratu urrunera



CAF
ELHUYAR
SARIAK
2023

Antolatzaileak:
CAF elhuyar
ezagutuz aldatzea

Babeslea:
NEIKER
UNIVERSITY OF
SUSTAINABLE
TECHNOLOGY & INNOVATION ALLIANCE



CAF-Elhuyar sariketaren irabazleak, ezkerretik eskuinera: Jon Sánchez Carrasco, Aitor Garmendia Etxeberria, Iñaki Sanz Azkue, Jacinto Iturbe Barrenetxea, Xabier Gantzarain Etxaniz, Enok Sudupe Altolagirre, Judith Zubia Aranburu eta Mattin Urbietta Galarraga. ARG.: Iñigo Ibañez/Elhuyar.

2023ko CAF-ELHUYAR SARIAK

“Begiratu urrunera” lelopean banatu dira CAF-Elhuyar sariak, Usurbilgo Suteği aretoan. Zientzia eta teknologia gizarteratzeko dibulgazio-lanak eta egitasmoak aitortzea eta bultzatzea da sariketaren xedea, eta aurtengo leloa Isaac Newtonen aipu honi lotuta dago: “Urrunago ikusi badut, erraldioen sorbalda gainean eseri naizelako izan da”.

CAF-Elhuyar sariketako parte-hartzaileek bete-betean egin dute bat leloarekin, lehendik egindako bidetik abiatuta, urrutira begiratu baitute. Eta bi gairi jarri diete arreta, bereziki: teknologia eta ingurumena. Hain zuzen, horri buruz idatzi dute sarituek: Judith Zubia Aranburu, Mattin Urbietta Galarraga, Iñaki Sanz Azkue eta Aitor Garmendia Etxeberria.

Sorkuntza-beka bi proiektuk jaso dute, erdi bana. Proiektuetako bat “Semiosi-
genesi” da, Jon Sánchez Carrascoren; bestea, “Ia dena”, Kulturaz Azpeitiko kultura-kooperatibarena.

Azkenik, Jacinto Iturbe Barrenetxeak jaso du CAF-Elhuyar merezimendu-saria.

Garena egiten gaituena, egiten duguna idazteko

Gizakiok betidanik izan dugu hurrengo belaunaldiei ezagutza transmititzeko grina berezi bat, eta horrek informazioa gordetzeko zenbait modu deskubritu edota garatzera bultzatu gaitu. Gaurdaino dakigunaren arabera, horren lehen ebidentziak duela 40.000 urte inguruko labar-artean ditugu. Aurrerago, hizkuntzen sorrerarekin batera, lehen idatzizko testuak sortu genituen. Halaber, paperaren aurkikuntzak eta inprentaren garapenak ekarri zuten liburuak informazio-iturri gisa nagusitzea urte luzez.

Paradigma-aldaketa ordea, XX. mende erdialdean gertatu zen, elektronika digitalaren sorrerarekin batera. Izan ere, transistorearen eta mikrotxiparen garapenei esker, besteak beste, datuen biltegitratze digitala jaio zen.

Zer da datuen biltegitratze digitala?


Datuen biltegitratze digitala informazio digitala baliabide elektronikoen bidez biltegitratzean datza. Orobat, informazio digitala sistema bitarraren bidez (0ak eta 1ak baliatuz) adierazten den informazioa da. 0 eta 1 balioek egoerak adierazten dituzte. Esaterako, 0a "itzalita" egoerari dagokio, eta 1a "piztuta" egoerari; edo 0a tentsio elektriko konkretu bati, eta 1a beste tentsio bati. Nolanahi ere, bi egoera errepresentatzen dituzte. Sistema bitarrean, egoera-unitate horietako bakoitzari bit esaten zaio, eta 8 bit, bata bestearen segidan idatzita, byte bat eraikitzen da. Hortik abiatuta, eta milaka byte-ren bidez, testua, irudiak, bideoak, audioak eta bestelako informazio digitala eraikitzen da.

Datuen biltegitratze digitalari esker, informazio-kantitate handiak espazio fisiko txikian gordetzeaz gain, behin baino gehiagotan irakur eta edita daitezke [1]. Zinta magnetikoa, disketea, CDa, DVDa eta USBa dira azken hamarkadetan informazio digitala biltegitratzeko nagusitu diren sistema esanguratsuenetako batzuk. Medio fisiko horiek, ordea, biziraupen mugatua izateaz gain, ez dute informazioa partekatzea errazten. Horren harira, gaur egun datuak biltegitratzeko nagusitzen den sistema honako hau dugu: hodeia. Erosoa, azkarra, irisgarria, segurua, mugagabea eta jasangarria, ezta?

Spoiler: hodeia ez da existitzen

Bada, ez. Google, Amazon Web Services (AWS), Microsoft eta horrelako beste enpresa batzuek kudeatzen dituzten datu-zentroek osatzen dute "hodeia". Hortaz, azpiegitura horien konplexutasuna laburbiltzeko erabiltzen den metafora bat baino ez da hodeia [2].

Une batez, begiratu diezaiogun 2022. urtean egun bakoitzeko sortu dugun datu-kantitateari: 8,5 milioi bilaketa Googlen, 720.000 ordu YouTube, 93 milioi argazki Instagramen, 867 milioi txio Twitterren eta 333 mila milioi mezu elektroniko, besteak beste. Hortaz, 94 zettabyte inguru sortu eta kontsumitu ditugu azken urtean (1 zettabyte = 10^{21} byte). Alegia, bit bakoitza euro bateko txanpona balitz eta 1 zettabyte osatu arteko txanponak pilatuko bagenitu, 1.970 argi-urteko distantzia osatuko genuke; Alpha Centauri eguzki-sistematik gertuen dagoen izar-sistemara 225 joan-etorri egiteko bestekoa.



1. irudia. Sistema bitarretik DNara datuak kodetzeko prozesua. Irudia: Judith Zubia Aranburu.

Hori horrela izanik, datu-zentro horiek 10.000 m² inguruko azaleretan, zutabe eta lerro ugaritan, antolatzen diren zerbitzarien biltegi erraldoiak izatera iritsi dira. Zerbitzari horiek, jakina, hotz-sistema bat behar dute gainberotzeak saihesteko. Hori gutxi ez eta, "hodeia" une oro erabilgarri egon dadin eta sare elektrikoan gerta daitezkeen akatsen eragina hauteman ez dadin, gune horietan dieselez elikatzen diren sorgailuak egoten dira. Beraz, horrelako gune batek, urte batean, 50.000 etxebizitzek erabiltzen duten energiaren baliokidea kontsumitzen du. Datuak digitalki biltegitratzeko joera hazkorra ikusita, mende honen amaierarako, ekoizpen digital horri eusteko beharko den energia planeta osoko egungo energia-kontsumoa gainditzera iritsiko litzateke [3].

Alternatibarik?

Gauza bat garbi dago: hau ez da bidea. Norabidez aldatu behar dugu. Alternatiba bat aurkitu, edo batzuk. Ez da erreza, ez, baina galde diezaigun biziraupenaz guk baino gehiago dakien norbaiti, hots, guk baino esperientzia handiagoa duen norbaiti. Galde diezaigun naturari.

Nola lortu du naturak belaunaldiz belaunaldi gizakia gizaki edota zuhaitza zuhaitz egiten duena oroitzea? Nola aldatu gaitu eta du gure ingurua naturak, garai eta leku konkretu bakoitzean, ezaugarri

berezigarriak izan ditzagun? Funtsean, molekula bakar batekin: DNA (azido desoxirribonukleikoa) [4].

DNAz ari garenean, bizia bera datorkigu burura, baina ez informazioa edota ordenagailuak. Bada, DNA bera organismo batean informazioa gorde eta transmititzeko 4 letrako kodea da. Molekula hori lau nukleotidoz (adenina (A), timina (T), guanina (G) eta zitosina (C)) osatutako kate-bikoitzeko helizea da.

Informazio digitala DNA bihurtzeko, lehenik eta behin, datuak kodetu behar dira (ikusi 1. irudia). Hori egiteko zenbait modu daude, algoritmo bat idazteko zenbait lengoia dauden antzera. Aukera bat honako hau egitea da: sistema bitarreko 00 adierazteko, adenina erabiltzea, 01 guanina, 10 zitosina eta 11 timina [5]. Prozesu horren bidez, kate bakarreko DNA-sekuentzia eraiki daiteke % 99ko eraginkortasunarekin. Zergatik ez % 100eko eraginkortasunarekin? Bada, DNAREN sintesi-prozesuan badirelako saihestu ezin daitezkeen akats batzuk, eta, beraz, nukleotido bakoitzak gehienez gorde dezakeen informazioa, 2 bit-ekoa izan beharrean, 1,8 bit-ekoa da. Aipatzekoa da, akastuna den % 1 horrek arazoak eragin ditzakeela datuak biltegitratzean. Horregatik, kate bakarra sortu beharrean, kopia ugari sortzen dira, informazioa bere osotasunean ondo gordetzen dela bermatzeko.

Jarraian, sintetizatutako DNA hori biltegitatu behar da. Zenbait biltegitatze-sistema garatu diren arren, esan liteke bi estrategia daudela. Aukera bat DNA izoztu eta bere horretan gordetzea litzateke. Molekula hori egonkor mantendu daiteke milioika urtez baldintza horietan. Beste aukera bat DNA kapsulatu eta beste material batean txertatzea da. Estrategia hori “DNA-of-Things” edo “Gauzen DNA” deritzon ideian oinarritzen da, eta, funtsean, informazioa DNARA kodetu eta eguneroko objektuetan gordetzean datza. Horren adibide bat 2019an Suitza eta Israelgo ikerlari batzuek egindako lana da [6]. Haiek fitxategi digital bat DNARA kodetu eta beirazko partikula batzuetan kapsulatu zuten. Ondoren, partikula horiek polikaprolaktone (PCL) polimeroarekin nahastu eta, 3Dko inpresioaren bidez, objektu batean txertatu zituzten. Hortaz, inprimatutako objektuak berak fitxategi horretan biltegitatutako informazioa bere baitan izatea lortu zuten. Horrez gain, inprimatutako objektu horren edozein ataletatik DNA erauzi, eta PCR (Polymerase Chain Reaction) bidez anplifikatu zuten, eta, hala, frogatu zuten fitxategi hori objektu berrietan gorde zitekeela (ikusi 2. irudia).

Errealitatea edo zientzia-fikzioa?

Datuak gordetzeko DNA erabiltzea arrotza egiten bazaigu ere, ideia honek gero eta gutxiago du zientzia-fikziotik. Izan ere, gizakiok mende


honetarako ditugun erronkekin oso ondo lerrotatzen den estrategia da.

Informazioa DNA bidez biltegitatzea gaur egun darabilzkigun sistemak baino energetikoki eraginkorragoa eta jasangarriagoa da (ikusi 3. irudia), ondo kapsulatutako DNAk mendeak iraun baititzake giro-tenperaturan. Gainera, ez du mantentze-lanik behar, eta horrela gordetako fitxategiak erraz kopia eta erreplika daitezke.


Hori gutxi ez eta biltegitatze-sistema honek dentsitate handia du, DNA bidez gordetzen den informazioak oso bolumen txikia okupatzen baitu. Izan ere, DNA-gramo bakar batean, 215 petabyte sar daitezke ($1 \text{ petabyte} = 1 \text{ E} + 15 \text{ byte}$) [8]. Aurreikuspenen arabera, mundu mailan 169 zetta-byte-ko informazioa sortuko dugu 2025. urterako. DNA bidez biltegitatuz gero, kikara bat baino ez luke beteko.

Hala ere, esan beharra dago gaur egun oraindik DNA bidez datuak biltegitatzea garestia dela, eta gutxienez pare bat hamarkada pasatu beharko direla DNAREN sintesi eta erauzketarako sistemen prezioak jaitsi eta modu orokortu batean erabiltzen hasi arte [9].

Horrez gain, biltegitatutako fitxategiak abiadura egokian berreskuratzeak erronka bat izaten



2. irudia. DNA bidez informazio digitala biltegitatzeko prozesua. Irudia: Judith Zubia Aranburu.



3. irudia. Zenbait biltegitratze-sistemaren biziraupena, gaitasuna eta kostua. Grafikoa: Meiser *et al.*-etik [7] egokitua.

jarraitzen du. Izan ere, DNA gordetzeko erabilitako kapsula bakoitzak bertako edukari dagokion DNA-kode bat du etiketa gisa. Hortaz, fitxategi konkretu bat hautatu eta ateratzeko, gainontzekoak bere horretan utziz, DNA-etiketa horri dagokion abiarazlea gehitu behar zaio. Gaur egungo teknologiarekin, prozesu hori oso luzea da. Baliteke, hasiera batean behintzat, DNA bidez datuak biltegitratzea "biltegitratze hotza" deritzona egiteko baino ez erabiltzea. Hau da, datu ez-aktiboak edo oso gutxitan erabiltzen direnak gordetzeko soilik erabiltzea [10].

Begirada bat etorkizunari

Eta orain imajinatu. Imajinatu honelako etorkizun bat. Imajinatu beturreko berri batzuk erosi eta haien graduazioari, materialari eta fabrikazio-prozesuari buruzko informazio guztia beturrekoetan bertan egotea. Imajinatu erosketak egitera joan eta janari bakoitzaren prezioa produktuak berak izatea, barra-koderik gabe. DNA biodegradagarria da;

beraz, barrura. Imajinatu garena egiten gaituen hori egiten duguna idazteko erabiltzea.

Baina imajinatu, baita ere, zer suposa lezakeen horrek segurtasun eta datuen babeserako. Zein ondorio ekar litzake teknologia hori zuzen ez erabiltzeak? Zer egitera irits gaitzek? Zein da zientzialari eta ingeniarien ardura teknologia horren garapenean? Paradigma-aldaketa suposatu duten aurrerapen teknologiko eta zientifiko guztiek bezala, honek ere dilema etikoak sortu ez ezik, beste hainbat gai ere zalantzan jarriko ditu.

Datorrenean datorrela eta datorren bezala datorrela, behintzat, ez gaitzala ustekabeen harra-patu. ●



[Bibliografia, webgunean](#)

Elektroiekin dantzan nanoeskala argitzeko

Historian zehar eginiko aurrerapen teknologiko eta aurkikuntza zientifiko ugari gure ikusmen-gaitasunaren hobekuntzan oinarritu dira. XVI. eta XVII. mendeetan, bultzada nabarmena eman zieten biologia eta medikuntzari luparen eta, bereziki, lehen mikroskopia optikoen asmakuntzek. Sistema optiko tradizional horiek, ordea, bereizmen mugatua dute; alegia, difrakzioa pairatzen dute: tresna horien bitartez, erabilitako argiaren uhin-luzeraren antzeko tamaina, edo handiagoa, duten xehetasunak soilik bereiz ditzakegu. Ondoz-ondoko bi uhin-fronte edo gailurren arteko distantzia da uhin-luzera, 1. irudian ageri den bezala. Itsasoko olatuen kasuan, adibidez, gailurren arteko distantzia hamarnaka metrokoa izan ohi da. Argi ikusgaiaren kasuan, aldiz, uhin-luzera 380 nm eta 750 nm bitartekoa da, eta, beraz, ezin ditzakegu bereizi tamaina hori baino txikiagoa duten xehetasunak sistema optiko tradizionalak erabiliz.


Difrakzioak ezartzen duen muga gainditzeko, argia bere uhin-luzera baino txikiagoa den espazioan konfinatzea ahalbidetzen duten teknikak behar ditugu. Zorionez, argiak eta materialak nanoeskalen duten elkarrekintzaren ondorioz,

argiaren lokalizazioa lor daiteke eskala honetan. Nanofotonikaren erresuman murgildu behar gara horretarako.


Elektroiekin dantzatzuz

Argiaren uhin-luzeraz azpiko konfinamendua gainazaleko plasmioen bitartez erdiets daiteke, besteak beste. Zer dira, ordea, plasmoiak? Material eroaleetan, isolatzaileetan ez bezala, elektroiak aske higi daitezke. Elektroiei askeen multzoa gas edo hodei baten gisan irudikatu dezakegu. Hodei hori bere oreka egoeratik ateraz gero —2. irudian ageri den bezala—, elektroiei falta egongo da hodei hori hasieran zegoen lekuan. Gune batean, beraz, karga negatiboaren soberakin bat izango dugu, eta, bestetik, elektroiei horiek aurretik zeuden eskualdean, karga positiboaren soberakina. Karga positibo eta negatiboek elkar erakartzen dutenez, elektroiei-hodeiak erakarpen-indar bat pairatuko du, eta alde batetik bestera joango da oszilatzen, berezko maiztasun batekin. Alegia, elektroiei dantzan ibil daitezke material eroaleetan, eta berezko erritmo bat dute horretarako, materialaren araberakoa dena. Plasmoi deritze elektroiei askeen oszilazio kolektibo horiei.


Argia - uhin elektromagnetikoa



1. irudia. Argia (uhin elektromagnetikoa), eremu elektrikoa, eremu magnetikoa eta uhin-luzera.



2. irudia. Plasmioen (elektroi askeen oszilazio kolektiboen) eskema.



3. irudia. Argiak nanopartikuletan kitzikatutako plasmoiak.

Plasmoiak argiaren eta, oro har, uhin elektro-magnetikoen bitartez kitzika daitezke. Eroalea den egitura itxi batean —nanopartikula batean, adibidez—, bertako elektroiek uhin horren eremu elektrikoari jarraituko diote, eta nanopartikularen gainazalaren alde batean metatuko dira, 3. irudian ageri den bezala. Argiaren eremu elektrikoak oszilatzen ahala, elektroi-hodeiak ere oszilatzen egingo du hari segika, argiak markatzen dien eritmoan dantza eginez. Argiaren maiztasuna eta berezko maiztasuna berdinak baldin badira, erresonantzia bat izango dugu nanopartikulan, hau da, plasmoi bat kitzikatuko dugu.

Gainazalean dugun karga-metaketa horrek eremu elektriko bat sortuko du, indusitutako eremua deitu ohi dena. Eremu elektriko indusitu hori oso bortitza izaten da karga metatu den gainazalaren inguruan. Argiztatzeke erabili dugun argiaren intentsitatea baino 100 aldiz bortitzagoa ere izan daiteke, baina oso azkar (esponentzialki) ahultzen da gainazaletik aldendu ahala. Horrela eremuaren handipen bat izan dezakegu nanometro gutxi batzuetako eskualde batean. Ondorioz, plasmoiek argia lokalizatzeko gaitasuna dute, eta difrakzio-muga gainditzeko baliu daitezke. Horri esker, nanopartikularen gainazaletik gertu dauden

xeheetasunak bereiz ditzakegu; molekulak, adibidez. Nork pentsatuko luke elektroik dantzari batzuek nanoeskala argitu zezaketenik!

Ez hori bakarrik, nanopartikula plasmonikoek, argia nanoeskalan lokalizatzeaz gain, argia urrunera sakabanatzeko gaitasuna ere badute. Alegia, antena baten gisan, uhin elektromagnetikoak jaso eta ondoren igortzeko gaitasuna dute: nanoantena dira. Gaitasun hori dela eta, argia erabiliz nanopartikula plasmonikoak galdekatu ditzakegu, nanopartikulari eta honen inguruneari buruzko informazioa lortzeko.

Argiaren lokalizazioa mugara eramanez


Nanopartikuletan kitzikatu daitezkeen plasmoiek lau ezaugarrirekiko menpekotasuna dute: nanopartikularen tamaina, geometria, materiala eta ingurunea. Nire tesian, indusitutako eremuetan nanopartikulen geometriak duen eragina ikertu dut. Izan ere, erpinen inguruan eremu elektrikoak are gehiago lokalizatzen da eroaleetan, bertan elektroik gehiago metatzen direlako. Fenomeno horri tximistorratz-efektua deritzo (tximistorratzen funtzionamenduak fenomeno honetan du oinarria).

Nire tesian ikusi dudanez, eskala atomikoan ere antzeko portaera dute elektroiek. Plasmoiekin


konbinatuz gero, argiaren lokalizazio azpinanometrikoa erdiets dezakegu. Argiaren lokalizazio azpinanometrikoko horren bidez oso txikia den espazioari buruzko informazioa lortzen da, 4. irudian ageri den bezala. Adibidez, nanopartikula eta gainazal eroaleen artean molekulak baldin baditugu, azken horien bibrazioak kitzikatu eta haien egitura azter dezakegu. Bai, molekulek ere dantza egin dezakete!

Argiaren lokalizazioa auresateko beharrezko osagaiak

Halako nanopartikula edo nanoegitura baten erpinetan lor dezakegun eremuaren lokalizazioa simulazio bidez auresateko, zenbait eredu erabil ditzakegu. Izatez, atomoen kokalekua, hau da, kristal-egitura aintzat hartzen duen eredu batetik abiatu beharko ginateke. Ez hori bakarrik, elektroien izaera kuantikoa ere kontuan hartu beharko genuke. Tesi honetan, ordea, eremuaren lokalizazioa eta handipenaren zenbatekoa auresateko eredu sinpleagoak erabili ditugu. Elektroik-hodeiak kanpo-kitzikapenik gabe —alegia, argiztapenik gabe— duen itxura edo forma aintzat hartzea nahikoa izan daiteke kasu askotan. 5. irudian ageri dira bi adibide. Hau da, egitura kristalinoa zehatz-mehatz deskribatzea ez da ezinbestekoa. Dantzalekuari hormak jarri dizkiogu, elektroiek dantza egiteko erabiltzen duten espazioa aintzat hartuz, horrela



4. irudia. Ezkerretara, nanopartikula eroalea gainazal eroale baten gainean; tartean, eremua dago. Nanopartikula eta gainazalaren artean dauden atomoen tontortxoak argiaren lokalizazio azpinanometrikoko molekulak.



5. irudia. Ezkerretara, atomoak eta haien kokalekua kontuan hartzen dituen eredu. Erdian, argiaren lokalizazio azpinaometrikoa. Ezkerrean, elektroi-hodeiaren itxura era hurbilduan aintzat hartzen duen gainazala.

musikaren erritmoak eta dantzarien mugimenduek ez dezaten aldaketa nabarmenik pairatu.

Laginak aztertzeko eta plasmioak kitzikatzeko argia erabili beharrean, beste teknika batzuk ere erabil ditzakegu. Elektroi-sortez balia gaitzeko, adibidez, ekorketa eta transmisioko mikroskopia elektronikoak erabiliz. Halako mikroskopiaek elektroi-sortak jaurtitzen dituzte laginekin talka egin edo horiek zeharkatu ondoren berriz jasotzeko. Elektroi-sorta horiek galdu duten energia, pairatu duten desbideraketa eta beste hainbat parametro neurtzen dira horrela. Datu horiek erabiliz laginaren propietateak zein diren azter dezakegu. Gainera, argia erabiliz baino askoz bereizmen hobea lortzen da, eta nanometroz azpiko bereizmena ahalbidetzen da. Horrez gain, nanoegitura eroaleetan plasmioak kitzikatzeko erabil daitezke elektroi-sortak. Duten bereizmenagatik elektroi-sortak nanopartikularen geometriarekiko argia erabiltzen duten teknikak baino sentikorrak dira. Aukera paregabea, beraz, eredu mugak zehazteko. Nire tesian erakutsi dudanez, aipatutako eredu sinpleetan nanopartikularen geometria xehetasunez deskribatzea ezinbestekoa da eredu konplexuagoetan lortzen diren emaitzak berresteko.

Geometria modu hurbilduan, xehetasun gehiago edo gutxiagorekin, aintzat hartzeak nabarmen errazten ditu simulazioak. Are gehiago, esperimentu askotan erabiltzen diren nanoegitura asko handiegiak eta konplexuegiak dira atomoak banan-banan kontuan hartu ahal izateko eta modu horretan ordenagailu bidezko simulazioak egiteko.

Besterik gabe, gaur egun ditugun ordenagailuek ez dute nahikoa potentzia hain kalkulu astunak egiteko. Hortaz, ezinbestekoa da eskuragarri ditugun eredu sinpleagoek dituzten mugak eta gaitasunak zein diren zehaztea simulazioetan lorturiko emaitzen eta aurreikuspenen fidagarritasuna berresteko. Ez genuke-eta nahi elektroiak erritmoa galduta dantzan ibiltzea. ●

Bibliografia

- [1] L. Novotny and B. Hecht, "Principles of Nano-Optics", Cambridge University Press, Cambridge, 2012.
- [2] P. N. Prasad, "Nanophotonics", John Wiley & Sons, Inc., Hoboken, NJ, 2004.
- [3] M. Pelton, J. Aizpurua eta G. Bryant, "Metal-nanoparticle plasmonics", *Laser & Photonics Review* 2, 136–159 (2008).
- [4] F. Benz, M. K. Schmidt, A. Dreismann, R. Chikkaraddy, Y. Zhang, A. Demetriadou, C. Carnegie, H. Ohadi, B. de Nijs, R. Esteban, J. Aizpurua eta J. J. Baumberg, "Single-molecule optomechanics in "picocavities"", *Science* 354, 726–729 (2016).
- [5] M. Urbieto, M. Barbry, Y. Zhang, P. Koval, D. Sánchez-Portal, N. Zabala eta J. Aizpurua, "Atomic-Scale Lightning Rod Effect in Plasmonic Picocavities: A Classical View to a Quantum Effect", *ACS Nano* 12, 585–595 (2018).
- [6] R. Egerton, "Electron Energy-Loss Spectroscopy in the Electron Microscope". Springer US, Boston, MA, 2011.
- [7] F. J. García De Abajo, "Optical excitations in electron microscopy", *Reviews of Modern Physics* 82, 209–275 (2010).

uztaro

giza eta gizarte-zientzien aldizkaria

2023

Uztaro aldizkaria jaso nahi dut.

Izena-abizenak:

Helbidea:

Kodea eta herria:

Telefonoak:

Helbide elektronikoa:

N.A./I.F.K.:

Ordainketa:

Banketxea:

Zenbakia (20 digitu):

Sinadura

2023. urterako harpidetza (4 zenbaki): 25,00

Jakinarazi nahi dizugu Datu Pertsonalen Babeserako 15/1999 Lege Organikoan aurreikusitakoaren arabera, zure datuak "Harpidetzak" izeneko fitxategian sartuko direla. Datu pertsonalak biltzearen xedea soil-soilik da UEUrekin duzun *harremana kudeatzea eta gure jardueren berri eman ahal izatea edozein bitarteko erabiliz, posta elektronikoa edo antzeko bideak barne*. Eskubidea daukazu datuok ikusi, zuzendu, ezabatu edo aurka egiteko, honako helbide honetara idatziz: UEU, Erribera kalea 14, 1.D, 48005 Bilbo.

☐ Jakinarazpenik jaso nahi ez baduzu, laukitxoa markatu edo idatzi helbide elektroniko honetara: argitalpenak@ueu.eus



Harpidetza-txartela:

UDAKO EUSKAL UNIBERTSITATEA

Erribera 14, a. D 48005 Bilbo

Telefonoa: 946790546

Helbide elektronikoa: argitalpenak@ueu.eus

www.uztaro.eus

Jarraitu gurekin zientzia eta teknologiaren berriei, sarean aldizkaria.elhuyar.eus



ARG.: Amaia Iparragirre Letamendia

EKINEAN

“Beharrezkoa sentitzen dut emakume erreferenteak izatea”

Matematikek ospe txarra dute: zailak direla, abstraktuak direla, ez dutela ezertarako balio... Horrelako usteak oso zabalduta daude gizartean. Amaia Iparragirre Letamendia matematikaria da, eta ez du arrastorik ere nondik datorren ospe txar hori. “Ume-umetatik gustatu izan zaizkit”, adierazi du. Eta ez daki zergatik izango duten ospe txarra; uste du abstraktuak direlako izan daitekeela, agian (...).



ARG.: Julio Fernández Arribas/CSIC

ALBISTEAK

Janari eta edarietako bisfenol-A eta beste plastifikante batzuen arriskuaz ohartarazi dute

EFSA Europar Batasunean elikagaien segurtasunaz arduratzen den agintziak bisfenol-Aren eraginari buruzko azken ikerketak aztertu ditu (800 ikerketa baino gehiago, 2013tik), eta ondorioztatu du osasunari kalte egiteko arriskua duela.

Bisfenol-A, beste substantzia batzuekin batera, plastikoetan eta erretxinetan erabiltzen da; tartean, elikagaien (...).



ARG.: Max Planck Institute for Evolutionary Anthropology/Myrthe Lucas

ALBISTEAK

Paleolitoko zintzilikario batetik, erabiltzailearen genoma erauzteak lortu dute

Zenbait objektu arkeologikotatik DNA erauzteko metodo ez-suntsitzaile bat garatu dute Anatomia Ebolutiboko Max Planck Institutuan. Izan ere, hezurrez edo hortzez egindako tresnak porotsuak direnez, erabiltzailearen izerdia, odola edo listua izan dezakete. Bada, metodo horrekin, erabiltzailearen genoma erauzi daiteke halako tresnetatik, lagina suntsitu gabe (...).

Irailera arte



aldizkaria.elhuyar.eus



[@ElhuyarZientzia](https://twitter.com/ElhuyarZientzia)

Zer eta nor

elhuyar
ezagutuz aldatzea

Zelai Haundi, 3.
Osinalde industrialdea
20170 USURBIL (Gipuzkoa)
tel. 943 36 30 40
aldizkaria.elhuyar.eus

Zuzendariak:

Egoitz Etxebeste Aduriz (e.etxebeste@elhuyar.eus),
Ana Galarraga Aiestaran (a.galarraga@elhuyar.eus).

Publizitate-arduraduna:

Itziar Nogeras Berra (i.nogeras@elhuyar.eus).

Hizkuntza-arduraduna:

Saroi Jauregi Aiestaran.

Zenbaki honetako kolaboratzaileak:

Andoni Kortazar García, Igor Leturia Azkarate, Manu Ortega Santos, Mattin Urbieto Galarraga, Leire Urretxo de la Fuente, Judith Zubia Aranburu.

Azaleko argazkia:

© MPI for Intelligent Systems/Annette Cardinale.

Jatorrizko diseinua:

Eragin.com

Diseinua eta maketa:

Virginia Larrarte Neira.

Harpidetzak:

Virginia Larrarte Neira (harpidetza@elhuyar.eus).

Inprimatzailea:

Leitzaran Grafikak. Papera klororik gabea da, eta PEFC agiria du (ingurumen-kudeaketa jasangarriko basoetatik erazten da). Oinarri begetaleko tintak erabiliz inprimatu da.



Banatzailea:

Elkar.

Harpidetza paperean eta edizio digitala:

- Urtean 4 zenbaki (martxo, ekaina, iraila eta abendua).
- Euskal Herria eta Espainia: 28 €.
- Beste herrialdeak: 40 €.

CC BY-SA-3.0 Elhuyar Fundazioa

Lege-gordailua: SS-1089-2017

ISSN: 2603-6614

Elhuyarren jabetzako edukia Creative Commons lizentziapean dago, "Aitortu – Berdin partekatu (CC-BY-SA-3.0)" lizentzia. Beste jabetza batekoak diren edukiak jabeak adierazitako lizentziapean erabili dira, eta hala aitortu dira.

Elhuyar Fundazioak ez du derrigor bere gain hartzen aldizkarian adierazitako esanen eta iritzien erantzukizunik.

Aldizkariari diruz lagundu dion erakundea:





Behar dituzun erantzunak

Zientzia.eus

**Zientziari buruzko albisteak,
audioak, bideoak, agenda, argazkiak.**

26.000 edukitik gora. Entzun, irakurri, ikusi...
... eta ikasi!

elhuyar
ezagutuz aldatzea



BRTA
BASQUE RESEARCH
& TECHNOLOGY
ALLIANCE

brta.eus

PUNTAKO ALIANTZA TEKNOLOGIKOA, EUSKADIKO INDUSTRIAREN ESKURA

AZTERLAN
MEMBER OF BASQUE RESEARCH
& TECHNOLOGY ALLIANCE

AZTI
MEMBER OF
BASQUE RESEARCH
& TECHNOLOGY ALLIANCE

ceit
MEMBER OF
BASQUE RESEARCH
& TECHNOLOGY ALLIANCE

CICbioGUNE
MEMBER OF BASQUE RESEARCH
& TECHNOLOGY ALLIANCE

CICbiomaGUNE
MEMBER OF BASQUE RESEARCH
& TECHNOLOGY ALLIANCE

**CIC
energyGUNE**
MEMBER OF BASQUE RESEARCH
& TECHNOLOGY ALLIANCE

**CIC
nanoGUNE**
MEMBER OF BASQUE RESEARCH
& TECHNOLOGY ALLIANCE

cidetec
MEMBER OF BASQUE RESEARCH
& TECHNOLOGY ALLIANCE

Gaiker
MEMBER OF
BASQUE RESEARCH
& TECHNOLOGY ALLIANCE

IDEKO
MEMBER OF BASQUE RESEARCH
& TECHNOLOGY ALLIANCE

ikerlan
MEMBER OF BASQUE RESEARCH
& TECHNOLOGY ALLIANCE

Leartiker
MEMBER OF BASQUE RESEARCH
& TECHNOLOGY ALLIANCE

LORTEK
MEMBER OF BASQUE RESEARCH
& TECHNOLOGY ALLIANCE

NEIKER
MEMBER OF
BASQUE RESEARCH
& TECHNOLOGY ALLIANCE

tecnal:a
MEMBER OF BASQUE RESEARCH
& TECHNOLOGY ALLIANCE

Tekniker
MEMBER OF BASQUE RESEARCH
& TECHNOLOGY ALLIANCE

vicomtech
MEMBER OF BASQUE RESEARCH
& TECHNOLOGY ALLIANCE

araba álava
foru aldundia diputación foral

Bizkaia
foru aldundia
diputación foral

Euzko Legebiltzarra
Asamblea de Euzkadi
Euzko Legebiltzarra
Asamblea de Euzkadi

**GRUPO
spri**
TALDEA

EUSKO JAURLARITZA
GOBIERNO VASCO